


श्रीमद्भगवद्गीता

(डोगरी पद्यानुवाद)

लक्ष्मी नारायण शर्मा



विवेक प्रकाशन

142-फतू चौगाब

जम्मू (लकी) - 180001

श्रीमद्भगवद्गीता

(डोगरी पद्यानुवाद)

लक्ष्मी नारायण शर्मा

विवेक प्रकाशन

142-फत्तू चौगान

जम्मू (तंवी)-180 001

SHRIMADBHAGAVAT GITA

(Dogri Padyanuvas)

Lakshmi Narain Sharma

© विवेक प्रकाशन

अजय शर्मा

142-फतू चौगान, जम्मू (तवी)-180001 भारत

प्रकाशन ब'रा	:	1998
पैहली पुज्ज	:	500
मुल्ल	:	150/-

छापाखाना : क्लासिक प्रिंटर्ज

नेशनल हाइवे बाड़ी ब्राह्मणां

फोन : (92) 20243

समर्पण

देह मुक्त श्रीमती उषा रानी अग्रवाल (पुष्प) जी दे.नां जिनेंगी
उंदे पूर्वजनम च 'बूजी' दे रूप च जानने दा सौभाग्य बी मिगी अपने
इस्सै जीवन च होआ।

जातस्य हि ध्रुवो मृत्यु
ध्रुवं जन्म मृतस्य च।
तस्मादपरिहार्येऽर्थे
न त्वं शोचितुमर्हसि ॥

(गीता II. 27)

आभार

अऊं डॉ० ओम गोस्वामी ते श्री श्यामलाल रैणा हुंदा आभारी आं जिनें मेरे इस गीता
अनुवाद दी छपाई सरबंधी जिम्मेवारी सांभियै मेरा कम्म सैहल करी ओड़ेआ।

भूमिका

श्रीमद्भगवद्गीता दी सार्वभौमक महत्ता दा पता मिगी विदेश जाने पर लगा। पच्छमी विद्वानें द्वारा कीते गेदे गीता दे छड़े अंग्रेजी अनुवाद गै छे सौ कोला उप्पर न ते संसार च कोई बिरली गै भाशा होग जिस च गीता दा अनुवाद नेई होआ। इंयां गै संसार दी बक्खरी-बक्खरी भाशाएं च गीता पर लखोए दे विवेचनात्मक ग्रैंथें दे तमार लग्गे दे न ते इंदे च दिनो दिन बाढ़ा होआ करदा ऐ।¹ गीता भारत दी आत्मा च ते अचरी दी गै ऐ पर कन्ने गै गीता ने संसार गी बी मोहत करी लैते दा ऐ। दर्शन ते साहित्य दे पच्छमी विद्वान इस ग्रैंथ दी चर्चा करने ते सुनने दा मौका हाई-माई नेई खुंझांदे। पच्छम दे दार्शनिक द्रिष्टीकोन ते साहित्य पर गीता ने किन्ना गूढ़ा-रंग चाढ़ेआ, दिक्खियै मन चम्भत होई जंदा ऐ। पर इस तत्थ दा ब्योरा देने दा थाहर इत्थें नेई ऐ। भारत दे पैहले गवर्नर जनरल वारन हेस्टिंगज (1732-1818) ने चाल्र्स विल्किंज कृत गीता दे अंग्रेजी अनुवाद लेई लिखे दे अपने वक्तव्य च आखेआ हा जे जेलै ब्रिटिश साम्राज्य नेई रौहग तां ओलै बी गीता दी सत्ता बनी रौहग।² गीता कर्म, ज्ञान ते भक्ति दा संगम ऐ, ते एह त्रै तत्त गै माहनू दे

1. दिक्खो-Jagdish Chander Kapoor, *Bhagavat-Gita, An International Bibliography of 1785-1979 Imprints* (New York, London, Garland Publishing Inc., 1983).

2. "...and these (writings) will survive when the British domination in India shall have long ceased to exist...."

—Warren Hastings, "To Nathaniel Smith, Esquire" in the *Bhagvat Geeta* (1875) translated by Charles Wilkins (Gainsville, Florida, 1959 imprint.), P. 13.

अध्यात्मक जीवन दा सार न। गीता दे इस सार्वभौमक अध्यात्मक दर्शन करी हर माहनू दी अध्यात्मक लोड़ पूरी होई जंदी ऐ, ते गीता दा एह गूढ़ अध्यात्मक तत्त गै केइयें लेई इस्सी कुसै न कुसै रूपै च दूएँ तोड़ी पजाने दी प्रेरणा बनी जंदा ऐ। गीता दे इस अनुवाद लेई गीता दे मूल संस्कृत पाठ दा बड़ी बरीकी ते सावधानी कन्ने मनन करना अति अवश्यक हा। इस लेई मिगी शंकराचार्य, आनन्द गिरि, रामानुजाचार्य, माधवाचार्य, मधुसूदन सरस्वती ते श्रीधर स्वामी द्वारा गीता पर लिखी दी विवेचनात्मक समग्री गी पढ़ना पेआ जिसी गीता सरबंधी विवेचना दा आधार मन्नेआ जंदा ऐ। कन्ने गै Sir Charles Wilkins, J. Cockburn Thomson, Sir Edwin Arnold, Prof. Franklin Edgerton, Prof. Juan Mascarow, Prof. Eliot Deutsch, Prof. R.C. Zaehner आदि पच्छम दे नेक विद्वानें द्वारा कीते दे गीता दे अंग्रेजी अनुवाद, जिंदे ने विस्तृत विवेचना ते टिप्पनी बी जुड़ी दी ऐ, पढ़ने करी बी मेरे लेई गीता दे केई दार्शनिक तत्थें दियां घुंडियां खुल्ली गेइयां। गीता दे विद्वानें कन्ने जिज्ञासू दे रूप च इस ग्रँथ सरबंधी चर्चा करने दा अवसर प्राप्त होने करी बी मिगी गीता दा तत्त्वार्थ समझने च बड़ी मती सहायता मिली। ते एह सब त्यारी करने पैंत गै मिगी गीता दे गूढ़ ग्रँथ दा डोगरी अनुवाद करने दा हौसला पेआ।

गीता दे मूल अर्थ गी सजीव ते संपूर्ण रूप च डोगरी पद्य च ढालना गै इस अनुवाद दा उद्देश्य ऐ। अनुवाद दा अर्थ ऐ कुसै वाद या कथन दा अनुसरन करना। इस लेई कुसै कथन दे मूल तत्त गी ठीक-ठीक ते चंगी चाल्ली कुसै होर भाशा च ढालना गै अनुवाद ऐ। जियां जीवात्मा दी पोशाक देह ऐ इयां गै बचार दी पोशाक भाशा ऐ जिस च ओह परतकख होंदा ऐ। इस लेई अनुवाद दी सार्थकता उस स्पष्टता ते भरपूरता च ऐ जेहड़ी इस च कुसै मूलभाव ते बचार गी थोंदी ऐ। अनुवाद च अनुवाद दी लूस नेई मौलकता दी सुगंध होनी चाहिदी, ते एह तां गै होई सकदी ऐ जेकर मूल पाठ दे अनुवाद च यथार्थता दे

कन्ने-कन्ने काव्यात्मकता दा बी अंश होऐ पर इस करी मूल तत्त विकृत नेई होऐ। न गै अनुवाद पर अनुवादक दे निजि द्रिष्टीकोन, भाव, मत जां व्याख्या दा छौरा पौना चाहिदा। अनुवाद दा कम्म निरपक्व शीशे आह्ला लेखा बरतना ऐ तां जे अनूदित पाठ दा मूल तत्त उयां दा उयां गै प्रकाशत होई सकै, ते पाठक इस मूल तत्त दे बारे च अपनी समझा मताबक सुतैतर रूप कन्ने धारना बनाई सकै। गीता च कृष्ण अर्जुन गी आखदे नः

गूढ़ शा बी अति गूढ़ ज्ञान

एह तेरे लेई में दिता,

भलेआं शैल बचारी इस्सी

कर जो तेरी इच्छा (गीता XVIII.63)

इस कथन च गीता ज्ञान दी गूढ़ महत्ता दे कन्ने-कन्ने इस ज्ञान गी दूएँ तोड़ी पजाने दे ढंग दा बी पता चलदा ऐ। अनुवादक द्वारा अनुवाद गी मूल पाठ दे सरबंधै च अपने सैधांतक पक्खपात दा हथ्यार बनाने करी न छड़ा उस अनुवाद च मूल पाठ दा तत्त धुंधलोई जंदा ऐ बो पाठक कन्ने बी छल होंदा ऐ, की जे इस करी पाठक गी उस बारै अपनी बुद्धि अनुसार बचार करने दा अवसर नेई थ्होंदा।

अनुवाद सरबंधी इनें मरयादाएं दा पालन करदे होई गै में गीता दे मूल संस्कृत पाठ गी डोगरी च ढालने दा भरपूर जतन कीता ऐ।

श्रीमद्भगवद्गीता महर्षि वेद व्यास द्वारा रचत महाकाव्य महाभारत दे भीष्म पर्व दा भाग ऐ। गीता च इस पर्व दे 23में ध्याऽ कोला लेइयै 40में ध्याऽ तोड़ी 18 ध्याऽ शामिल न*। गीता दे इनें ठाहरें ध्याएं च 700 श्लोक न, पर

*"The Bhishma Parvan" in *The Mahabharata*, ed. Shripad Krishna Belvalkar (Poona, Bhandarkar Oriental Research Institute, 1947), Vol.7.

कुतै-कुतै गीता दे 13में ध्याऽ दे अरंभ च इक बाफर श्लोक बी मिलदा ऐ।
उदाहरण दे तौर पर एह श्लोक श्री औरबिंदु आश्रम (पाण्डीचरी) द्वारा मुद्रित
गीता च, जिस च संस्कृत श्लोकें दे कन्ने-कन्ने इंदा अंग्रेजी अनुवाद ते
समीक्षात्मक सार बी शामिल ऐ, दिक्खेआ जाई सकदा ऐ।

प्रकृतिं पुरुषंचैव क्षेत्रं क्षेत्रज्ञमेव च
एतद्वेदितुमिच्छामि ज्ञानं ज्ञेयं च केशव*

इस श्लोक दा डोगरी रूपांतर ऐ :

प्रकृति पुरुष, क्षेत्र क्षेत्रज्ञ,
कन्ने ज्ञेय ते कन्ने ज्ञान,
एह न जो बी, हे केशव,
जानने दा अऊं इच्छावान।

गीता दा डोगरी अनुवाद करने बेलै गीता ने मेरे अन्तःकरण पर जो छाप
लाई ते मेरे अंदर जिनें भावें गी जाग्रत कीता उंदी सांझ थुआड़े ने पाने लेई मिगी
'गीता तत्त बचार' लिखने दी प्रेरना मिली। इस पुस्तक च गीता दे गूढ़ अध्यात्मक
तत्थें दी जीवन सरबंधी सार्थकता ते लाभकारता दा अलोचनात्मक विवेचन
कीता गेदा ऐ ते इस पुस्तक गी तौले कोला तौले छापने दा जतन कीता जाग।
पर इस बेलै गीता दा एह डोगरी पद्यानुवाद तुसेंगी दिंदे होई मिगी बड़ा संदोख
होआ करदा ऐ ते अऊं मेद करना जे इस अनुवाद करी डोगरी पाठकें च गीता
दे गूढ़ तत्तें लेई रुचि च होर मता बाद्धा होग।

लक्ष्मी नारायण शर्मा

* Anilbaran Roy, ed. *The Gita with Text, Translation and Notes*; Com-
piled from Sri Aurobindo's *Essays on the Gita* (Pondicherry, Sri
Aurobindo Ashram, 1954), XIII, I; P. 208.

पैहला ध्याऽ

धृतराष्ट्र उवाच

धर्म क्षेत्र कुरु क्षेत्र च किट्ठे
युद्धै लेई पसोए दे
के कीता, संजय, पाण्डवें
ते उनें जो मेरै होए दे ॥ 1 ॥

संजय उवाच

पाण्डव सेना दी ब्यूह रचना
दिक्खी राजै दुर्योधन,
गुरु दे नेड़ै आई करी फही
उन्न गलाया ए बचन ॥ 2 ॥

पाण्डु पुत्रें दी आचार्य
दिक्खो ए सैना भारी,
चतुर द्रुपद सुत शिष्य शुआड़े नै
कीती इस दी ब्यूहकारी ॥ 3 ॥

बड़े-बड़े धनखी इस रन च,
शूर भीम, अर्जुन समान,
द्रुपद महारथी ते विराट,
सात्यकि खुआंदा जो युयुधान ॥ 4 ॥

धृष्टकेतु, चेकितान,
 काशीराज वीर्यवान,
 पुरुजित ते कुन्ति भोज,
 शैब्य जेहड़ा नर महान ॥ 5 ॥

पराक्रमी युधामन्यु
 उत्तमौजा अति बलवान्,
 अभिमन्यु, द्रौपदी जाए,
 महारथी सब गै समान ॥ 6 ॥

ब्राह्मनराज, जो साढ़े पासै
 मुख, करो उन्दे नै पछान,
 मेरी सैना दे जो नायक
 थुआड़े लेई अऊं करां बखान ॥ 7 ॥

श्रीमान्, भीष्म ते कर्ण,
 कृपा जो जितदा विच संग्रामा
 विकर्ण ते सोमदत्त दा पुत्तर,
 उन्दे कत्रैं अश्वत्थामा ॥ 8 ॥

होर बी न केई सारे योधा
 मेरे लेई जो त्यागन जीन,
 धारने आले नेक शस्त्र जो
 सब दे सब संग्राम प्रवीन ॥ 9 ॥

भीष्म द्वारा सांभे दा
 ए साढ़ा बल अनसम्भा,
 भीम जिनें दा ऐ राखा
 उन्दा ऐ बल मन्दा ॥ 10 ॥

इस लेई सबनें युद्ध थलें पर
 डटियै अपने-अपने थाहर,
 सब दे सब निश्चै करियै
 करो भीष्म रक्षा दी कार ॥ 11 ॥

कुरु बडेरे पितामहा ने
 करदे ओदा मन परसन्न
 संख बजाया परतापी ने
 करियै सिंह सांई गरजन ॥ 12 ॥

फही बज्जे सैख, ढोल, मरदंग,
 नरसिंहे ते नगारे,
 गडगज्ज पेई गेई घोर जेलै
 बज्जे इक्कै लै सारे ॥ 13 ॥

उत्तम रथ चिट्ठे घोड़ें आला
 जिस च उनें हे आसन लाए
 श्री कृष्ण ते अर्जुन ने बी
 अति अलौकिक शंख बजाए ॥ 14 ॥

हषिकेष ने पाञ्चजन्य,
 धनंजय ने देवदुत्त,
 बृकोदर भयकारी ने कीता
 महाशंख पौण्ड्र गी स्फुरत ॥ 15 ॥

अनन्त विजय गी नरेश युधिष्ठिर
 ने जो कुन्ति सुत,
 सुघोष गी नकुल ने ते
 सहदेव ने मणिपुष्पक ॥ 16 ॥

श्रेष्ठ धनखी काशीराज,
 महारथी जो शिखण्डी,
 धृष्टद्युम्न, विराट ते सात्यक
 जिन्दी निं पराजय भण्डी ॥ 17 ॥

द्रुपद, महाबाहु अभिमन्यु,
 पञ्च द्रौपदी दे प्यारे,
 इनें सबने कीता धूना, राजन,
 सैक्खें दा न्यारे न्यारे ॥ 18 ॥

पाई इस घोर ध्वनि ने
 धरती ते अम्बर च त्रट्ट,
 धृतराष्ट्र दे पुत्रें दे
 हिरदै अन्दर बज्जा फट्ट ॥ 19 ॥

धृतराष्ट्र दे पुत्रे गी
 ब'ने दे युद्धै लेई कतार
 दिक्खियै चुक्केआ धनख अर्जुन ने
 होने बेलै शस्त्र प्रहार ॥ 20 ॥

ते पही हषिकेश लेई, राजन,
 अर्जुन कीता ए उचार,
 अच्युत, मेरा रथ खडेरौ
 दौने सैनै दे बशकार ॥ 21 ॥

तां जे अऊं नजरी च चाढ़ां
 युद्धै लेई जो खड़े तेआर,
 कु'दे ने जोग ऐ मेरे करनी
 इस संग्राम च युद्ध दी कार ॥ 22 ॥

युद्धै लेई तुले दें गी अऊं
 दिक्खां जो दुक्के इस थाहर
 धृतराष्ट्र दे चन्दरे पुत्तरें दा
 रनै च करने लेई उपकार ॥ 23 ॥

संजय उवाच

अर्जुन दे ए आखे कृष्ण ने
 दौने सैनाएं बशकार
 भीष्म द्रोण दे अगै
 जित्ये सबनै राजै दा बी थाहर ,

उत्तम रथ आनीं खडेरैआ
 ते पही ए कीता उचार,
 किट्टे होए ए कौरव, अर्जुन,
 इन्दे पैर तूं दृष्टि मार ॥ 24, 25 ॥

दिक्खे अर्जुन ने उत्थे
 करने आले ज्ञान प्रसार,
 चाचे, सौहरे, दादे, मामें,
 पुत्तर, पोतरे, भ्रा, हितकार
 मल्ली जो खडोते दे हे
 दौनें सैनाएं च थाहर ॥ 26 ॥

इनें सबने नाते साकें दा
 डटे दे हे जो, करियै ध्यान
 बेदन ने गरसोए दा तां
 बोलेआ अर्जुन शोकवान ॥ 27 ॥

अर्जुन उवाच

अपने साकें दा दिक्खी,
 हे कृष्ण, रनै लेई होए दा संग ॥ 28 ॥

मुंह मेरा सुक्का दा, केशव,
 ढिल्ला पवा दा अंग अंग,
 देह मेरी च छिड़ी दी कम्बनी
 सरकंडै चुक्की ले डंग ॥ 29 ॥

गाण्डीव हत्था चा छुड़का दा
कन्नै खलड़ी च पवा दा साड़ा,
टिकना इक थाहर मुहाल होआ
भरमे दा मारा मन माहड़ा ॥ 30 ॥

केशव, मिगी बझोआ करदे
पुठे पुठे लक्खन,
नेई जचदा भला रनै च
नातेदारें दा फट्टन ॥ 31 ॥

नां राजै दी, नां सुखें दी,
नां गै कृष्ण विजय दी चाह,
राज साढे लेई ऐ कित कारी,
भोग जां जीने दा के लाह ॥ 32 ॥

जिन्दे लेई सुख भोग राज दी
अस करने आं हिरस,
ओ सब रनै च आई खड़ोते
प्राण, धनें दी तजियै किरस ॥ 33 ॥

गुरु जन, पुत्तर कन्नै पोतरे
दादे, बड्डे बडेरे,
साले, मामे, सौहरे होर बी
नाके साक बत्हेरे ॥ 34 ॥

मरां भाएं नेईं करड कदेह
इन्दी हत्या दी चाराजोई
राज त्रिलोकी दे लेई बी
पृथवी दी गल्ल के होई ॥ 35 ॥

धृतराष्ट्र दे सुत मारी असें
लददनी कोहकी खुशी दी लदद,
मारी इनें कबत्तें गी
पापा गी गै पानी सदद ॥ 36 ॥

धृतराष्ट्रसुत नाते इस लेई
नेईं इन्दा बध साढ़े जोग,
अपनें गी गै मारी, माधव,
असें गी किस चाली सुख होग ॥ 37 ॥

भाएं ए नेईं समझी सकदे
लुब्धै दी जिन्दे मन छाप
कुल नष्ट करने दा दोष
मित्र द्रोह दा भारी पाप ॥ 38 ॥

पाप इस शा बचने लेई, केशव,
की नेईं अस करचै बचार,
कुल विनाश ने होने आली
हानी दे अस जानकार ॥ 39 ॥

कुल विनाश करि हुन्दे नष्ट
कुलै दे धर्म सनातन,
धर्म नाश होऐ तां कुलै पर
होन्दा पाप दा शासन ॥ 40 ॥

पाप बधै तां, कृष्ण, होन्दिआं
कुल नारियां बदकार,
बदकार नारियें शा होन्दी
संकरबर्न दी पैदावार ॥ 41 ॥

कुल ते कुल घातियें गी
संकरबर्न नरक च सुटदा,
पिण्ड पानी क्रिया दे लोप ने
इन्दे पितरें दा बेड़ा डुबदा ॥ 42 ॥

ए दोष गै, जिन्दी लगदी
बर्नसकरें कारन थड़,
कुल घातिएं दे प्राचीन कुल धर्म
ते जाति धर्म दी पुटदे जढ़ ॥ 43 ॥

इनें माहनुएं दा, जिन्दे
कुल धर्म दा होन्दा नाश,
औंदा ए सुनने च, जनार्दन,
होन्दा नरक च बास ॥ 44 ॥

बसोस! असें महापातक
 करने लेई लक्क न बद्धे,
 राज सुखै दे लुब्धै लेई
 अपनै गी गै मारन लगगे ॥ 45 ॥

खरा होर बी मेरे लेई
 जे अऊं निहत्था करां नीं बार,
 शस्त्रधारी धृतराष्ट्र पुत्र जे
 रनै च मेरा करन संहार ॥ 46 ॥

संजय उवाच

ए आखी अर्जुन रनै च बेही आ
 मल्ली रथै दी पिछली भेठ,
 धनुषबान सुट्टे इक बक्खी,
 मनै च पौंदा शोक दा बेठ ॥ 47 ॥

श्रीमद्भगवद्गीता उपनिषद्, ब्रह्मविद्या ते योग शास्त्र
 सरबन्धी श्री कृष्ण-अर्जुन संवाद च अर्जुनविषादयोग नां दा पैह्ला
 ध्याऽ समाप्त होआ।

• • •

दूआ ध्याऽ

संजय उवाच

अत्थरुं भरोचे बिकल नेत्र
कलपा ने जिस्सी घेरा पाया,
इयां कलपदे अर्जुन लेई ए
मधुसूदन ने बचन गलाया ॥ 1 ॥

श्री भगवान उवाच

इस औक्खी घड़ी लगा, अर्जुन,
तूई कुत्थूं ए कलैकी झूरा,
नेई आर्य जोग, न सुर्गदायी ए,
माहनू दे जस दा बैरी पूरा ॥ 2 ॥

हीजड़ें आली गल्ल नेई कर तू,
नेई, अर्जुन, इत तेरा मान,
छोड़ परें थुड़ दिली निकम्मी,
उठ, कर हुप्फ, बन हिम्मतवान ॥ 3 ॥

अर्जुन उवाच

भीष्म, द्रोण गी युद्ध च अऊं,
मधुसूदन, मारां कियां बान,
दोए केहूडे ए, हे अरि सूदन,
करने जोग न मान ॥ 4 ॥

महां गुरुएं दी हत्या शा खरा
 इत्ये खाने टुक्कर भिक्ख च थोए,
 गुरु मारी बी इत्ये भोगड
 कामार्थ भोग लौहुए ने भरोए

॥ 5 ॥

पता नेई ए बी साढ़े लेई के करना ऐ श्रेष्ठ,
 न गै ए जे अस जितगे जां ओ असें गी जितडन,
 नेई जीन्दे रौहने दी इच्छा जिन्दी हत्या करियै,
 धृतराष्ट्र दे पुतर उयै साढ़े अगैं स्थित न ॥ 6 ॥

कायरता दोश ने स्वातम ग्रसेआ,
 मन धर्म नीं जानैं, अऊं प्रशनी,
 दस्सो जो खरा, देओ मी सिक्खेआ,
 अऊं शिष्य आं थुआड़ा, थुआड़ी शरनी ॥ 7 ॥

सम्पन्न भूम दा राज अकंटक
 जां देवें पर प्रभुताई
 पाइयै बी नीं थोए उपाऽ उस दुख दा
 जेहड़ा दिन्दा जिन्द सकाई ॥ 8 ॥

संजय उवाच

ए आखी कृष्ण गी अर्जुन ने
 गलाया फही कृष्ण गी ए दो टूक
 नेई अऊं ए युद्ध करने आला,
 ते, राजन, फही होई आ मूक ॥ 9 ॥

कृष्ण ने हसदे होई, राजन,
 दौनें सैनें दे बशकार
 सोगै च पेदे अर्जुन लेई
 फही कीता ए बचन उचार ॥ 10 ॥

श्री भगवान उवाच

जो कलपने जोग निं उनें गी कलपै
 पंडतें आले बचन उचारी,
 गेदें जां अनगेदें लेई नेई
 होन्दे ज्ञानी शोकाचारी ॥ 11 ॥

न ए जे में कदैं नेई हा,
 जां तू, जां ए राजे लोग,
 ते न ए जे फही इस अगैं
 न फही साढ़ा होना होग ॥ 12 ॥

देह अन्दर देही गी जियां
 बचपन, जोबन, बुड्ढपना पौंदा,
 पांदा इयां गै होर देह ओ,
 धीर नेई इस लेई भरमोंदा ॥ 13 ॥

सर्दी, गर्मी, विषय सम्पर्क जो,
 कुन्ती पुत्तर, सुख दुख कारी,
 अनित्य ते औने जाने आले,
 भरतवंशी, लै इनें गी स्थारी ॥ 14 ॥

ए विषय नेई करदे जिस्सी ब्याकुल
मिथै जो सुख दुख इक समान,
पुरुष श्रेष्ठ, ओ पुरुष धीर
अमरता दा अधिकारी जान ॥ 15 ॥

नेई है जो कदै 'है' नेई होन्दा,
है जो नेई होन्दा कदै 'नेई' है',
इनें दौनें दा सार ए कड्डेआ
तत्त ज्ञानिणं शैल परखियै ॥ 16 ॥

अविनाशी तू इस गी जान
जिस करी इस सब किशे दा तत्त,
नाशहीन उस दा विनाश
करने दी कुसै च नेई सरमत्थ ॥ 17 ॥

अन्तवान ए देह खुआंदे
देही दे जो नित्त अमर,
जो बुद्धि शा परै, इस कारन,
भरतवंशी, तू रन कर ॥ 18 ॥

जो इस गी समझे मारू ते जो
इसगी मेरे दा मनदा,
ओ दोऐ केढ़े अज्ञानी,
न ए मारदा न गै मरदा ॥ 19 ॥

न जमदा न कदैँ ए मरदा,
न ए होइयै पही परतोँदा,
नित्त अजन्मा सदा, पुरातन,
देह जा, इस दा काल निं होन्दा ॥ 20 ॥

नित्त अविनाशी, अमर अजन्मा,
ज्ञान एहका इस दा करै जो धारन,
ओ, पार्थ, कुसै दा कियां घाती,
कियां कुसै दे घात दा कारन ॥ 21 ॥

टल्लें परानें दा परित्याग करियै
नमें होर टल्ले जियां माहनू लांदा,
त्यागी पराने देह इंया गे होर
नमें देहें च आत्मा ऐ समांदा ॥ 22 ॥

शस्त्र नीं इस गी फट्टी सकदे,
अगग नीं दिन्दी इस गी दाह,
जल नीं इस गी गिल्ला करदा,
नेई सकांदी इस गी ब्हाऽ ॥ 23 ॥

न ए सिजदा, न गै सुकदा
न सड़दा, न जन्दा बेधन,
नित रौहदा, सब थाहरें जा
इक थाहर टिके दा, अचल सनातन ॥ 24 ॥

न परतक्ख, न सोचें औदा,
 न पौदा इस च विकार,
 गलादे ए, जानी इयां इस्सी,
 नेई शोभै तूई शोकाचार ॥ 25 ॥

जे कर तूं मिथें ए बी जे
 ए जमदा सदा, सदा मरदा,
 तां बी शोक, माहाबाहो,
 नेई तुगी ए फबदा ॥ 26 ॥

जो जमदा मरदा, ए पक्का,
 जो मरदा, पक्का ए, जमदा,
 अटल तत्थ ए, इस लेई
 तेरा शोक तूई नेई जचदा ॥ 27 ॥

रौहदे न अप्रकट आदि च,
 होन्दे प्रकट आई बशकार,
 अन्तकाल अप्रकट पही होन्दे,
 पही कित करना शोकाचार ॥ 28 ॥

चर्ज करी इस्सी दिखदा कोई,
 कोई चर्ज करी एहदा करै बखान,
 सुनदा कोई चर्ज करी इस्सी,
 कोई सुनियै बी नीं पा एहदा ज्ञान ॥ 29 ॥

निम्न अमर आत्मा हर देह च ,
इस लेई सब प्राणियों दा सोग
स्हेड़ी लैना नेइऊं बनदा
अर्जुन तेरे जोग ॥ 30 ॥

धर्म अपना बचारने पर बी
नेई भय च तेरा सम्मान,
धर्म युद्ध शा बद्ध कोई दूआ
करै नि क्षत्री दा कल्याण ॥ 31 ॥

अपने आप जेहड़ा आई पुज्जा
सुर्ग रूप जेदा खुल्ला द्वार,
पाइयै इयै नेहा संग्राम
पांदे क्षत्री सुखै दा सार ॥ 32 ॥

पर जेकर तूं धर्म युद्ध ए
नेई करगा, नेई लड़गा,
तां जस, धर्म गुआई अपना
पापै दा लड़ फड़गा ॥ 33 ॥

अपजस फही तेरा माहनू
करदे रौहगन केई चिर,
मान इज्जत आलें लेई अपजस
मौती शा बी बत्तर ॥ 34 ॥

महारथी मिथडन तूई ओ
डरै नें रनै शा जो उक्का,
तुच्छ बनी जागा उन्दे लेई
जिन्दे लेई तू हून उच्चा ॥ 35 ॥

तेरी सरमत्था निंदडन जो
नेई न तेरे हितकारी,
बोलडन अति बोल नेई बोलने आले
इस शा दुख होर के भारी ॥ 36 ॥

जितें तां भोगें पृथिवी गी,
जे मरें तां खु'ल्लन सुर्ग द्वार,
उठ, अर्जुन इस लेई पक्के पैरें
युद्ध कर्म लेई हो तेआर ॥ 37 ॥

जय पराजय हानी लाभ
सुख दुख करियै इक समान,
ब'नी लै युद्धै लेई लक्क
पाई लैगा पापै शा त्रान ॥ 38 ॥

दिक्ती तुगी ए सांख्य योग दी बुद्ध
योग दी बुद्ध दा सुन हुन बरनन,
बुद्ध इस कन्नै जुड़े दा
लैगा त्रौड़ी कर्म दा बन्धन ॥ 39 ॥

न जतन इस च जन्दा बिरथा,
 न विघ्न दा बस चलदा,
 लेश मात्र बी इस धर्म दा
 बड्डे शा बड्डा भय हरदा ॥ 40 ॥

इक डाल गै रौहंदी, कुरुनन्दन,
 ओ बुद्ध जो ऐ सुलझोई दी,
 गिन्तरियें पेदे आलें दी बुद्ध
 अनसम्भ शाखें च बंडोई दी ॥ 41 ॥

वेद बाद रत हिरस भरोचे
 नेई जिन्दे च बित्रेक दा लेश,
 सुर्ग गै उत्तम जानन,
 देन 'होर नेई किश बी' उपदेश,
 कर्मकाण्ड दे पचडैं लह्दी
 सत्ता भोग दे पासै धकदी
 जन्म कर्म फल देने आली
 जो बोलन बानी फबदी ॥ 42-43 ॥

उस उन्दे हरे चित्त, लिप्ति
 सत्ता भोग च होई दी,
 उन्दे अन्दर नेई लभदी
 बुद्धि जो सुलझोई दी ॥ 44 ॥

त्रै गुण विषय न वेदें दे,
 त्रौ गुनें दा कर, अर्जुन, निस्तार,
 हो आत्मवान दूई शा मुक्त,
 तज योग क्षेम, नित सच्च धार ॥ 45 ॥

जिन्ना मतलब उस बौली ने
 जेलै सबनै पासैं पानी,
 उन्ना वेदें नैं ब्राह्मन दा
 जिसने लेआ ब्रह्म पन्छानी ॥ 46 ॥

कर्म मात्र अधिकार तेरा,
 नेई फल इच्छा इस दा भाग,
 मत फल बनै कर्म दा हेतु,
 मत अकर्म नैं लगै लाग ॥ 47 ॥

सिद्धि असिद्धि करियै इक्क
 मल्ल, अर्जुन, योगी दा थां,
 कर कर्मैं गी होई बेल्लाग,
 समत्व योग इस्सै दा नां ॥ 48 ॥

बुद्धि योग शा, हे धनंजय,
 कर्म सकाम अति गै हीन,
 बुद्धि योग दी शरन लेई लै,
 फलै दी हिरसा आले दीन ॥ 49 ॥

समत्व बुद्धि इत्ये गै तजदा
पाप पुत्र दौनें दा पज्ज,
जुड़ इस लेई समत्व योग च,
योग ऐ कम्म करने दा चज्ज ॥ 50 ॥

बुद्धि योग ने जुड़े दे त्यागन
फल कर्म दा ज्ञानबन्त
जन्म बन्धन शा होइयै मुक्त
पान गति ओ निष्कलंक ॥ 51 ॥

बुद्धि तेरी शा जित बेलै
मोह दी दलदल पार लंघोग
श्होग तूई वैराग्य जेहड़ा
सुनेआ ते जो सुनने जोग ॥ 52 ॥

सुनि सुनि भलखोई दी जेलै
आई इक थाहर खड़ोग
अचल समाधि च मति तेरी
ओलै पागा योग ॥ 53 ॥

अर्जुन उवाच

समाधि च स्थित, हे केशव,
स्थिर बुद्धि दे के लक्खन,
के स्थिर मति दी चाल ढाल,
के उस दा बैठन ते बोलन ॥ 54 ॥

श्री भगवान उवाच

मनै दी कुल्ल कामनाएं गी,
पार्थ, जद ओ बरधांदा,
पांदा अपने च सन्दोख,
स्थिर मति तां ओ खुआंदा ॥ 55 ॥

दुखै च नेई जेदा मन खिञ्जै,
न सुखै च जिस च हिरस समाऽ,
लाग, क्रोध, भय मुक्के जेदे,
उयै स्थिरमति मुनि खुआऽ ॥ 56 ॥

जो सबने शा बेलाग,
चंगी मंदी पौने पर
जो करदा हर्ष न करदा द्वेष,
उस्सै दी बुद्धि ऐ स्थिर ॥ 57 ॥

इन्द्रियां उन्दे विषयें शा
जद ओ लैदा भलेआं डक्की,
कछुआ अपने अंग जियां,
उस्सै दी बुद्धि थिर पक्की ॥ 58 ॥

निराहारी माहनू दे भाएं
होई जन्दा विषयें दा नवारन,
हिरस मनै दी नेई पर मुकदी,
मुकदी ओ पाई प्रभु दर्शन ॥ 59 ॥

ज्ञानी पुरुष दे, कुन्ती पुत्र,
करदे रौहने पर बी जतन,
इन्द्रियां दृढ़ी जबरा कनै
हरी लैन्दियां न मन

॥ 60 ॥

उनें सबनें दा थम्मन करियै
योग लगै लेई मेरी आहर,
इन्द्रियां न वशै च जेदियां
उस्सै दी बुद्धि इक थाहर

॥ 61 ॥

माहनू विषयें गी जद ध्यांदा
होई जंदा उन्दे ने मोह,
मोह शा होन्दी इच्छा,
इच्छा शा फही होन्दा रोह,
रोह शा होन्दी मूढ़ता,
मूढ़ता शा स्मृति भरमाऽ,
स्मृति भरमाऽ करी बुद्धि नाश,
बुद्धि नाश विनाश कराऽ

॥ 62-63 ॥

करी राग द्वेष शा छिडै
कीती दियां जो अपने बस
इन्द्रियै ने विषयें ने बर्ती
मुक्तात्मा पांदा सुख रस

॥ 64 ॥

सुख रस कारन होई जन्दा
सबने क्लेशों दा निस्तार,
प्रसन्न चित्त माह्नू दी बुद्धि
तौली गै जमदी इक थाहर ॥ 65 ॥

योग हीन च मत्त नीं होन्दी,
योग हीन च नेई आस्तिक रुख,
आस्तिक रुख बाजू नेई शान्ति
ते अशान्त गी कुत्थे सुख ॥ 66 ॥

बिचरन करदी इन्द्रियें चा
जिस दे पिच्छै मन फिरदा,
उयै मति हरी लैदी जियां
बायू नौका गी हरदा ॥ 67 ॥

इस लेई इन्द्रियें गी भलेआं
विषयें शा जो लैदा डक्की
उस दी, हे महाबाहो, बुद्धि
स्थिर रौहदी पक्की ॥ 68 ॥

सब जीबें लेई रात जो उस च
संजमी करदा जगराता,
जागन जिस च सब प्रानी
ओ मिथै रात मुनि तत्त दा ज्ञाता ॥ 69 ॥

अटल प्रतिष्ठावान परिपूर्ण सागर जियां
 नदियें सबूरियें गी लैदा अपने च डोबी,
 कामनां इयां गै सब्बै जेदे च समांदियां
 पांदा उयै शान्ति, नेई कामनाएं दा लोभी ॥ 70 ॥

बिन ममता हंकार बिना
 कुल लालसाएं हिरसें गी त्यागी
 बरतदा जेहका माहनू ओ
 बनी जन्दा शान्ति दा भागी ॥ 71 ॥

इयै ब्रह्म अवस्था, अर्जुन,
 ए पाई नेई भरम च जागा,
 अन्तकाल बी इस च रेहियै
 बह्मानन्द गी पागा ॥ 72 ॥

श्रीमद्भगवद्गीता उपनिषद्, ब्रह्मविद्या ते योग शास्त्र
 सरबन्धी श्री कृष्ण-अर्जुन संवाद च सांख्ययोग नां दा दूआ ध्याऽ
 समाप्त होआ।

...

त्रीया ध्याऽ

अर्जुन उवाच

कर्म शा ज्ञान गी उप्पर
जेकर तुस ओ, कृष्ण, गलांदे
तां पही घोर कर्म च, केशव,
कैसी मिगी फसांदे ॥ 1 ॥

रले मिले बोलें करी मेरी
बुद्ध भरमाऽ जन खन्दी,
निश्चित करियै इक गल्ल दस्सो
जो मेरे लेई चंगी ॥ 2 ॥

श्री भगवान उवाच

इस लोक च, निष्पाप, मैं पैहले
निष्ठा दऊं भांति दी बखानी,
कर्म योग राहें योगियें दी ते
ज्ञान योग राहें उन्दी जो ज्ञानी ॥ 3 ॥

न कर्म नेई करने करी माहनू
होन्दा नैष्कर्म्य दा भागी,
न गै प्राप्त करै सिद्धि ओ
छड़ा कर्म गी त्यागी ॥ 4 ॥

कोई कुतै लै बी इक खिन भर
 कर्म बिना नेई रौहदा
 प्रकृति दे गुनें च बज्झा
 ओ जाई कर्म च पौन्दा ॥ 5 ॥

कर्मेन्द्रियें गी जबरन रोकी
 मनें च करदा रौहदा ध्यान
 इन्द्रियें दे भोगें दा जो
 गूढ़ पखण्डी उसगी जान ॥ 6 ॥

उच्च ओ अर्जुन जो मनै ने
 इन्द्रियें गी नत्थदा,
 निर्लेप कर्म इन्द्रियें ने
 कर्म योग च लगदा ॥ 7 ॥

नियत कर्म कर तू
 अकर्म शा कर्म दा उच्चा थाहर,
 कर्म बिना नेई चलदा
 जिन्दू दा बी कारोबार ॥ 8 ॥

जग कर्म बिन बाकी कर्म
 बनदे इस लोक च बन्धन,
 इस करी, अर्जुन, होई बेलाग
 कर सब कर्म उससै दे अर्पन ॥ 9 ॥

कल्पादि च जग समेत
परजा रचियै उचरे ब्रह्मा,
जग करी तुस बधो फलो, होऐ
थुआड़ी हीखें दा तत्ता थम्मा ॥ 10 ॥

इस्स कत्रै पले दे देवता
देवता तुसें गी पालन,
इक दूए दा पालन करदे
परम लाभ संभालन ॥ 11 ॥

जग नै पले देवें करी थुआड़े
इच्छित भोगें दी पूर्ति होग,
चोर जो इनें गी बिन दिते
इन्दे दिते दे भोगै भोग ॥ 12 ॥

जग दा बचे दा अन्न जो खन्दे
सब पापें शा मुक्ति पांदे,
पापी ओ पाप गे भखदे
छड़ा जो अपने लेई पकांदे ॥ 13 ॥

नाज शा होन्दे सब्बै जीव,
वृष्टि शा होन्दा नाज,
जगै शा होन्दी वृष्टि,
जग दा सिर्जन करदा काज ॥ 14 ॥

कर्म गी होए दा ब्रह्म शा,
 ब्रह्म गी अक्खर शा जान,
 इस लेई सर्व व्यापी ब्रह्म
 सदा जगै च बर्तमान ॥ 15 ॥

चालित चक्र दा ए बरतन
 जो नेई इत्थे अनुसरदा,
 पाप आयु इन्द्रिय सुख भोगी
 बृथा ओ जीवन करदा ॥ 16 ॥

जो माहनू आत्मा गी गै चाहदा,
 आत्मा च गै रौहदा तृप्त,
 पांदा आत्मा च गै सन्दोख,
 नेई करने जोग कोई उस लेई किरत ॥ 17 ॥

न करने न नेई करने नैं इत्थे
 रौहदा ओदा किश सरोकार,
 न जीबें दे ओ गोचरै,
 न उन्दे नैं कारोबार ॥ 18 ॥

इस लेई रेहियै अलिप्त
 कर नित करने आली कार,
 कर्तव्य कर्म कर्ता अलिप्त
 परम पुरुष दे जन्दा थाहर ॥ 19 ॥

जनक आदि कर्म द्वारा गै
जाई पुज्जे सिद्धि दे थाहर,
करना कर्म शोभदा ए तुगी
लोक एकता दा करी बिचार ॥ 20 ॥

श्रेष्ठ जन करदा जो बी
बाकी जन करदे तद अनुसार,
ओ जो बी करदा प्रमान
लोक ऊआं गै करन व्यहार ॥ 21 ॥

त्रैलोकी च मेरे लेई
नेई किश बी करने दी लोड़,
अऊं कर्म रत, भाएं उस दी
प्राप्त जोग जो नेई मी थोड़ ॥ 22 ॥

जेकर नेई बर्ता कर्म च
अऊं बरती सजगताई,
मेरा बर्तन गै भलेआं बर्तै,
अर्जुन, कुल लुकाई ॥ 23 ॥

जेकर नेई अऊं कर्म करां
एह लोक तां रौहन नि बाकी,
होआं बर्न संकर दा कर्ता,
बनां इस प्रजा दा घाती ॥ 24 ॥

कर्म लिप्त होई, अर्जुन, जियां
करदे कर्म अनजान,
ज्ञानी निर्लेप करै इयां गै
जन संगठन दा धरियै ध्यान ॥ 25 ॥

कर्म लिप्त अज्ञानां आलें
दी बुद्धि ओ नेई भरमाऽ,
योग जुड़े दा सब कम्म करदा
ज्ञानी उन्दे शा बी कराऽ ॥ 26 ॥

प्रकृति दे गुनें करी गै
सब कर्म दा होना बनदा,
अहंकार भरोचा माहनू
'अऊं कर्ता' ए मनदा ॥ 27 ॥

गुन विभाग ते कर्म विभाग
दा तत्त जिसी ऐ थ्हांदा,
बरतन गुनें च गुन ए जानी
नेइऊं ओ लपटोंदा ॥ 28 ॥

प्रकृति दे गुनें ने भरमोए
जो गुन कर्म च फसदे,
न्हे थुड़ ज्ञानी मूढ़ें गी नेई
भरज्ञानी विचलित करदे ॥ 29 ॥

करी अर्पन सब कम्म मेरै
चित्त ने जो अध्यात्मवान,
लाग हिरस सन्ताप बिना
एहकेड़ा संग्राम तू ठान ॥ 30 ॥

श्रद्धालू ते बिना कुतर्क
मेरे इस मत अनुसार
चलदे जेहड़े ओं पांदे
सबने कर्मै शा निस्तार ॥ 31 ॥

ते दोष दृष्टि आले जो
नेई चलन मेरे इस मत अनुसार,
ज्ञान भ्रष्ट, मूढ़ चित्त जिन्दे
उज्जड़न ओ, बन जानकार ॥ 32 ॥

ज्ञानवान बी कर्म न करदे
अपने गै स्वात्म अनुसार,
जीब सभाऽ बस गै बर्तन
हठ के करी सकदा कार ॥ 33 ॥

इन्द्रियें दे इन्द्रिय विषयें च
राग द्वेष दा थाहर,
मत पवें इनें दौने दे बस,
हित बत्ता दे ए बटमार ॥ 34 ॥

बेगुन स्वधर्म खरा पर धर्म शा
 जेदा भाएं होऐ चंगा पालन,
 स्वधर्म च मरना बी हितकारी,
 पर धर्म बनै अति भय दा कारन ॥ 35 ॥

अर्जुन उवाच

ए माहनू करदा पापाचार
 कुस दे फही कृष्ण चलेरे दा,
 बिन मर्जी बी जबरन जियां
 कुस दा ए धकेरे दा ॥ 36 ॥

श्री भगवान उवाच

रजो गुन दा जाए दा
 जो ऐ काम उयै ऐ क्रोध,
 पापी महाभक्खी अगग,
 बैरी ए, कर इस दा बोध ॥ 37 ॥

धूं ने अग्नि, धूड़ ने दर्पन,
 जेर ने गर्भ खटोए दा,
 काम बिकार ने इस्सै चाल्ली
 ज्ञान ऐ ए लकोए दा ॥ 38 ॥

ज्ञानियें दा नित्त बैरी काम
 ज्ञान गी खट्टी रखदा,
 काम रूप, अर्जुन, नेई कदें बी
 अग्नि साई रजदा ॥ 39 ॥

बुद्धि, मन, इन्द्रियें गी
 आखदे काम दा अड्डा,
 काम इन्दे नै ज्ञान गी खट्टी
 करदा जीव गी जड्डा ॥ 40 ॥

इस लेई तू सुन, अर्जुन, पैहले
 इन्द्रियें गी करियै जेर
 ज्ञान विज्ञान दे घातक इस
 पापी गी कर भलेआं ढेर ॥ 41 ॥

इन्द्रियां विषयें शा उप्पर,
 उप्पर इन्द्रियें शा मन,
 मनै शा ऐ उप्पर बुद्धि,
 बुद्धि शा उप्पर ओ न ॥ 42 ॥

इयां बुद्धि शा परे ओ जानी
 अपना अपने पर कर अधिकार,
 हे महाबाहो, अति जाबर,
 काम रूप शत्रु गी मार ॥ 43 ॥

श्रीमद्भगवद्गीता उपनिषद्, ब्राह्मविद्या ते योगशास्त्र सरबन्धी
 श्री कृष्ण-अर्जुन संवाद च कर्मयोग नां द्वा त्रीया ध्याऽ समाप्त
 होआ।

• • •

चौथा ध्याऽ

श्री भगवान उवाच

अविनाशी योग ए मैं
विवस्वत लेई सुनाया,
विवस्वत ने मनु गी, मनु ने
इक्ष्वाकु गी समझाया ॥ 1 ॥

परम्परा शा प्राप्त एदा
राजर्षियें लेआ ज्ञान,
योग ए मते काल शा इत्ये
होए दा हा लपायमान ॥ 2 ॥

योग पुरातन इयै अज मैं
तेरे लेई गलाया,
योग ए उत्तम मर्म भरोचा,
तूं मेरा भक्त मन भाया ॥ 3 ॥

अर्जुन उवाच

जन्म थुआड़ा होआ हून
विवस्वत जन्म पुराना,
योग ए पैह्लैं तुसें सुनाया
ए कियां अऊं जाना ॥ 4 ॥

श्री भगवान उवाच

मेरे ते तेरे अर्जुन
बीते दे जन्म बहरे,
नेई थौह तूई, अर्जुन, उन्दा,
ओ सब्बै ज्ञान च मेरे ॥ 5 ॥

अमर अजन्मा भावें,
भावें जीवें पर मेरा अधिकार,
करी अधीन प्रकृति अपनी
माया ने हुन्ना साकार ॥ 6 ॥

जद जद होन्दी धर्म दी हानी
चढ़दा पाप लोआर,
तदूं तदूं गै, अर्जुन, अऊं
करनां आं प्रकटाकार ॥ 7 ॥

संत जने दी रक्षा लेई
दुष्टें दा करन संहार,
धर्म थापना लेई धारना
युगै युगै च अऊं अवतार ॥ 8 ॥

जन्म ते कर्म न मेरे अलौकिक,
जो इस तत्त गी बुझदा,
त्यागी देह पुनर्जन्म नीं पान्दा
ओ मेरे श आई पुजदा ॥ 9 ॥

राग, क्रोध, भय शा जो छुड़के,
मेरे न्हे, मेरा आसरा पाई
ज्ञान ते तप ने शुद्ध केइयें गी
होई मेरी तत्त रसाई ॥ 10 ॥

जो जियां मिगी पूजन मेरा
उन्दे नैं उयै नेहा बर्तन,
मेरे मार्ग दा, पार्थ, न करदे
माहनू सब भांति ने पालन ॥ 11 ॥

कर्म, फलै दे इच्छुक इत्ये
देवें दा जगग करदे,
जगग कर्म करी माहनू लोक च
तौले गै फल सरदे ॥ 12 ॥

मेरे शा होई चऊं बनें दी
सृष्टि गुन कर्म अनुसार,
अविनाशी अकर्ता अऊं भावें
जान मी गै इस दा करतार ॥ 13 ॥

नेई व्यापदे कर्म मिगी, न
कर्म फलै दा मोह मी ग्रसदा,
मी भलेआं जिस जानेआ इयां
कर्म निं उस्सी ब'त्री सकदा ॥ 14 ॥

ए जानियै कीता कर्म
 उनें जो पैहले होए बिरत,
 इस लेई तुम्मी कर जियां
 कीती पिछलैं पिच्छैं किरत ॥ 15 ॥

के ऐ कर्म, अकर्म ऐ के,
 ज्ञानी बी इत्त भुलेखा खान,
 कर्म तत्त इस लेई तूई दस्सां
 जिस करी अशुभ शा पागा त्रान ॥ 16 ॥

कर्म दा बी करो ज्ञान,
 पाओ बिकर्म दा बी पार,
 अकर्म दा बी जानो तत्त,
 कर्म दा ए अति डूहगा सार ॥ 17 ॥

करियै बी नेई कीता जानै,
 कीता नेई करने पर,
 सर्व कर्मकारी उयै
 योगी, ज्ञानी नरें च ओ नर ॥ 18 ॥

सबने कर्मैं च जेदे
 संकल्प, कामना लेई नेई थां,
 ज्ञान अग्नि च भस्म कर्म, ओदा
 पांदे स्याने पण्डित नां ॥ 19 ॥

नित्य तृप्त, नेई कुसै दे सहारे,
 कर्म फलै दा मोह तजदा,
 कर्म गी भलेआं करने पर बी
 ओ कोई कर्म नेई करदा ॥ 20 ॥

बेहिरस, जिस जित्तेआ अपना आप,
 सब भोग समग्री जिस त्यागी,
 छड़ा देहक कर्म करी बी नेई
 ओ बनदा पापै दा भागी ॥ 21 ॥

थोए जे उस्सै च सन्दोख,
 द्वन्द्व ते ईर्षा नेई नेडै,
 सिद्धि असिद्धि इक्क समान,
 ओ करी बी बन्धन नेई स्हेडै ॥ 22 ॥

लाग मोह जिस कोला बरधे
 ज्ञान च ऐ जिस दा चित लीन,
 जगै लगै मोखी दे सब
 कर्म न होन्दे भलेआं खीन ॥ 23 ॥

ब्रह्म भेट, ब्रह्म हवन समग्री,
 ब्रह्म अग्नि च औहती ब्रह्म,
 ब्रह्मकर्म समाधि कने
 प्राप्ति जोग जो ओ बी ब्रह्म ॥ 24 ॥

देव जग दी गै किश योगी
 शैल उपासना बरदे,
 किश ब्रह्माग्नि च जगै ने
 जग दा हवन गै करदे ॥ 25 ॥

श्रोत्रादि इन्द्रियें दा केई
 संजम अग्नि च दिन्दे दाह,
 इन्द्रिय अग्नि च केई करदे
 शब्दादि विषयें गी स्वाह ॥ 26 ॥

प्राण ते सब इन्द्रियें दी कार
 केई ओड़दे जाली,
 आत्म संजम योग अग्नि अन्दर
 जेहूडी ज्ञान ने बाली ॥ 27 ॥

द्रव्य, तप ते जोग जग दे
 दूए न किश कारी
 साधक स्वाध्याय, ज्ञान जग दे
 अति कठिन व्रतधारी ॥ 28 ॥

किश अपान च प्राण दा ते किश
 अपान दा प्राण च करदे हवन,
 प्राण अपान दी गति रोकी किश
 प्राणायाम च लांदे लगन ॥ 29 ॥

किश पान प्राण औहत प्राणै च
 ते करन निजमत आहार,
 ए सब यज्ञ दे ज्ञानी जिन्दे
 यज्ञ ने धोते पाप बिकार ॥ 30 ॥

यज्ञ अन्न अमृत छकदे जो
 पुजदे कोल सनातन ब्रह्म,
 यज्ञ हीन लेई लोक नेई ए बी,
 अर्जुन, कित परलोक दा भरम ॥ 31 ॥

नेक जगें दा होए दा इयां
 ब्रह्म दी बानी च बिस्तार,
 कर्म शा होए दे इनें सबें गी
 जानी तूं पागा निस्तार ॥ 32 ॥

द्रव्य ने कीते यज्ञ शा, अर्जुन,
 ज्ञान यज्ञ उपपर,
 जिन्ने बी न यज्ञ कर्म
 इनें सबने दा ज्ञान गै धुर ॥ 33 ॥

जान उस्सी पुच्छी समझी
 पौ चरने च, कर सेवा पेश,
 ज्ञानी तत्त दर्शी उस ज्ञान दा
 देडन तेरे लेई उपदेश ॥ 34 ॥

जानी जिस्सी, अर्जुन, फही नेई
 पौगा मोह दे फेरे च,
 जिस करी दिखगा जीव तू सब्बै
 अपने ते फही मेरे च ॥ 35 ॥

जे सब पापियें शा बी पापी
 करने आला पापाचार,
 ज्ञान दी नौका ने जाई पुजगा
 तू सबनें पापें शा पार ॥ 36 ॥

बलदी अग्नि च बालन दी
 अर्जुन जियां बनै बभूत,
 ज्ञान अग्नि इयां गै सब
 कर्म गी करदी भस्मीभूत ॥ 37 ॥

नेई किश बी होर पवित्तर
 होन्दा इत्ये ज्ञान समान,
 समा पाई सिद्ध योगी करै
 आपूं अपने च एदा भान ॥ 38 ॥

श्रद्धावान जितेन्द्रिय पांदा
 ज्ञान, रक्खी उस्सै पर तक्क,
 ज्ञान पाने पर होन्दी उसदी
 तुरत परम शान्ति ने झत्त ॥ 39 ॥

ज्ञान बिन, बिन श्रद्धा संशालू,
 नुआड़ा ते विनाश गै होंदा,
 संशालू लेई न ए लोक न अगला,
 ते न गै उस्सी सुख थोंदा ॥ 40 ॥

योग करी होआ कर्म निबेड़ा,
 होआ ज्ञान करी संशय खंडन,
 आत्मवान न्हे गी, हे धनंजय,
 नेई पौन्दा कर्म दा बन्धन ॥ 41 ॥

मन थड़े दा इस लेई संशय अपना
 जिस दा सुम्ब अज्ञान,
 कट्टी ज्ञान कटार ने, अर्जुन,
 उठ धारी योग च ध्यान ॥ 42 ॥

श्रीमद्भगवद्गीता उपनिषद्, ब्रह्म विद्या ते योगशास्त्र
 सरबन्धी श्री कृष्ण-अर्जुन संवाद च ज्ञानकर्मसंन्यासयोग नां दा
 चौथा ध्याऽ समाप्त होआ।

...

पंजमां ध्याऽ

अर्जुन उवाच

कर्म त्याग दी, कृष्ण, तुसें
फही योग दी कीती बड़ेआई,
इन्दे चा जो चंगा दस्सो
मी तुस निश्चै पाई ॥ 1 ॥

श्री भगवान उवाच

सन्यास ते कर्मयोग
दोए न मुक्तिकारी,
इन्दे चा बी कर्मयोग ऐ
कर्म त्याग शा भारी ॥ 2 ॥

जानो ओ सदा सन्यासी
जो न करै द्वेष न चाह,
बिन दुविधा, अर्जुन, ओदा मुकदा
सौखा बन्धन कत्रै बाह् ॥ 3 ॥

सांख्य ते योग गी दसदे बक्ख बक्ख
ज्यान पुने आले, नेई ज्ञानी,
फल दौनें दा पा इक दी बी
जिन भलेआं सार पछानी ॥ 4 ॥

सांख्य ने जित्थे पुज्जन होन्दा
 नेंदा योग बी उस्सै थाहर,
 सांख्य ते योग इक्कै जो जानै
 उयै होन्दा जाननहार ॥ 5 ॥

बिना योग, महाबाहो,
 सन्यास ऐ औखा सधदा,
 योग जुड़े दा मुनि तौला गै
 ब्रह्म दे जाई लड़ लगदा ॥ 6 ॥

योग युक्त, शुद्ध चित्त आत्मवशी
 जिन इन्द्रियें दी थम्मी बाग,
 जीवात्मा सब आत्मा जिस दा,
 कम्म लगगे दा बी बेलाग ॥ 7 ॥

दिखदा, सुनदा, सौंदा, सुंघदा,
 खन्दा, जन्दा, छूह्दा, बोलदा,
 छोड़दा, फड़दा ते साह लैंदा,
 अक्खिएं गी मीटदा खो'लदा,
 मनै च ए धारना बसांदा,
 इन्द्रियां बर्तन अपने कम्मै,
 नेई आपूं किश करने आला,
 योगी तत्त ज्ञानी ए मन्नै ॥ 8-9 ॥

ब्रह्म अर्पन जो सब कम्म करदा,
 दिन्दा नेई ममता गी बत्तर,
 पाप शा ओ रौहदा निर्लेप
 जियां जलै च कमल दा पत्तर ॥ 10 ॥

काया, मन, बुद्धि ते जां फही
 छड़ा इन्द्रियें कन्नै
 कम्म करदे योगी आत्म शुद्धि लेई
 रेही लाग शा बन्नै ॥ 11 ॥

कर्म फल त्यागी योगी पांदा
 ब्रह्म मिलन आला सन्दोख,
 अयोगी फल कामी दा नेई
 कामना कारन होन्दा मोख ॥ 12 ॥

सब कर्मै गी मनै शा त्यागी
 नेई किश करदा नेई करांदा,
 न'में द्वारें दी देह नगरी च
 बसदा आत्मबशी सुख पांदा ॥ 13 ॥

ना कर्म, न कर्तापन लोकें दा
 नां गै कर्म फल दा संजोग
 रचदा प्रभु, स्वभाव करी गै
 बनदा इस बरतन दा जोग ॥ 14 ॥

न पाप कुसै दा, न गै पुत्र
 सर्वव्यापी करदा स्वीकार,
 ज्ञान अज्ञान ने खट्टे दा
 जिस करी जीव भरमै बशकार ॥ 15 ॥

ज्ञान नै जिन्दे अन्दरले
 अज्ञान दा कीता नाश
 उन्दा ज्ञान सूरज दी साईं
 उस परम दा करै प्रकाश ॥ 16 ॥

उस्सै च बुद्धि, उस्सै च आत्मा
 उस्सै च निष्ठा, उस्सै च गूढ़,
 पुज्जी जित्युआं नेई परतोदे
 ज्ञान ने झड़ी दी पाप दी धूड़ ॥ 17 ॥

गौ होऐ भावै जां हाथी,
 जां ब्राह्मन नम्र ज्ञानवान,
 कुत्ता भावै जां चण्डाल,
 दिक्खन ज्ञानी इक समान ॥ 18 ॥

मन जिन्दै समभाव समाया
 उन्नें इत्थे गै जग जितेआ,
 निर्दोष ते सम गै ब्रह्म, इस लेई
 उन्दा ब्रह्म च डेरा टिकेआ ॥ 19 ॥

चंगा होऐ तां खुशी नि होन्दी,
 मन्दे करी नीं होन्दा त्रास,
 स्थिर बुद्धि, नेई भरमोए दे,
 ब्रह्मज्ञानी दा ब्रह्म च बास ॥ 20 ॥

पांदा जो अपने च सुख,
बाहरी संसर्ग च नेई जो लीन,
ब्रह्म योग च जुड़े दा माहनू
पा सुख जो नेई होन्दा खीन ॥ 21 ॥

जो बी इन्द्रियें दे भोग
सब्यै न दुखै दी जढ़,
आओ जाई आले ए, ज्ञानी
नेई दिन्दे इन्दे च थड़ ॥ 22 ॥

देह छोड़ने शा पैहले
काम, क्रोध दा जों होन्दा
बेग, झल्लै उस्सी जो उयै
योगी, उस्सी गै सुख थ्हांदा ॥ 23 ॥

जिस अन्दर सुख, जिस अन्दर चैन,
अन्दर जिस दे बलदी जोत,
ब्रह्म रूप ओ योगी ओदी
ब्रह्म निर्वाण च होऐ खड़ोत ॥ 24 ॥

ब्रह्म च पांदे निर्वाण ऋषि
होए दे जिन्दे पाप खीन,
दुविधा शा छुड़के आत्मजयी
सब जीबें दे हितै च लीन ॥ 25 ॥

आत्मज्ञानी, मन बस जिन्दे,
 न काम क्रोध ने सरोकार,
 न्हें जतिये लेई ब्रह्म च मुक्ति
 बर्तमान र'वै सबनै थाहर ॥ 26 ॥

रक्खी विषय बाहरले बाहर,
 लाई दृष्टि भवे बशकार,
 करी इक डाल साह जो जन्दा
 नासें दे अन्दर ते बाहर ॥ 27 ॥

इन्द्रियां मन बुद्धि बसै च,
 मुक्ति दे साधन च युक्त,
 इच्छा, भय, क्रोध जेदे मुक्के
 मुनि ओ केहड़ा सदा गै मुक्त ॥ 28 ॥

सर्व लोक दा प्रभु महान
 जग ते तप दा पा जो भोग,
 सर्व प्राणिये दा हिरखी,
 ए जानी जुड़े शान्ति ने जोग ॥ 29 ॥

श्रीमद्भगवद्गीता उपनिषद्, ब्रह्म विद्या ते योग शास्त्र
 सरबन्धी श्री कृष्ण-अर्जुन संवाद च कर्मसंन्यासयोग नां दा पंजमां
 ध्याऽ समाप्त होआ।

• • •

छेमां ध्याऽ

श्री भगवान उवाच

फल इच्छा दा बिन लड़ फगड़े
करने जोग जो कर्म ऐ करदा,
उयै संन्यासी ते योगी,
नां ओ जो किरत ते अग्नि तजदा ॥ 1 ॥

जिस्सी आखदे न संन्यास
उस्सै गी, अर्जुन, योग जान,
संकल्प अनमुक्के जेदे लोभी
नेई पांदा योगी दा स्थान ॥ 2 ॥

मुनि दे योग च चढ़ने तांई
कर्म गलांदे कारन,
योग च चढ़ने परैन्त फही
शम गी कारन धारन ॥ 3 ॥

जो न इन्द्रियें दे विषयें च,
न कर्म च रुज्झे दा,
सब संकल्पें दा त्यागी,
उस्सी मनदे योगी पुज्जे दा ॥ 4 ॥

आपू अपना उद्धार बनो,
नां बनो आपू अपना संताप,
अपना आप गै अपना मित्तर
बैरी ॥ अपना अपना आप ॥ 5 ॥

आप गे उसदा अपना मित्तर
जिन आपू अपने गी जित्तेआ,
अपना आप निं जिदा ओ बैरी
अपने ने बैर कमांदे दिखेआ ॥ 6 ॥

होए गर्मी, ठण्ड जां सुख दुख,
होए भाएं मान अपमान,
आत्मजित, परम शान्त च
परमेशर रौहदा बर्तमान ॥ 7 ॥

ज्ञान विज्ञान ने तृप्त आत्मा
जिस कीता इन्द्रियें दा थम्मन,
योग युक्त, इक डाल उस लेई
इक्कै मिट्टी, बट्टा कञ्चन ॥ 8 ॥

बैरी, मित्र, बन्धु, बेगौरा,
साधु, पापी, द्वेषी, प्यारा,
बिच पौने आला, सबनें गी
जानै समान, ओदा उच्चा थाहरा ॥ 9 ॥

एकान्त च रेही योगी अपने गी
जोड़ै योग ने करियै हठ,
इक्कला, चित्त अपने बस्स, अकामी,
न करै ना-हक चीजें दा कट्ट ॥ 10 ॥

शुद्ध थाहर बछाइयै अपना
आसन जेहड़ा स्थिर,
न अति उच्चा न अति न्हीठा
कुशा, वस्त्र मृगछाला जिस पर ॥ 11 ॥

उस पर बेहियै रोकी चित्त
ते इन्द्रियें दा व्यवहार,
इक मन होइयै, आत्म शुद्धि तै
करै फही योगाभ्यास दी कार ॥ 12 ॥

देह, सिर, कंठ सेध च सब्बै,
इनें गी अचल अडोल करी रक्खी
दिक्खै अपने नक्कै दा नक्का,
दिक्खै निं होर कुसै बी बक्खी ॥ 13 ॥

शान्ति अन्दर, योगी भय मुक्त,
ब्रह्मचर्य व्रत धारी,
मन ब'न्नी मेरै चित्त लाई
सब मेरे अर्पनकारी ॥ 14 ॥

मनै गी सांभी, अपना आप
 नित इयां योग च ब'नै,
 पा निर्वान, परं शान्ति
 जो रौहदी मेरे कनै ॥ 15 ॥

योग निं सधदा पेटू दा,
 न उस दा जो करदा फाके,
 न उस दा जो अति सौंदा, अर्जुन,
 न उस दा जो करदा जगराते ॥ 16 ॥

खा बरते जो जथा जोग,
 जो जथा जोग कम्म करदा;
 जागै सवै जथा जोग, ओदा
 योग सिद्ध दुख हरदा ॥ 17 ॥

बसै च करियै चित्त भलेआं
 जद अपने च जाई बौहदा
 सब हिरसें शा रेही बेलाग,
 तां योगी नां पौंदा ॥ 18 ॥

नेई दीया जियां होऐ चंचल
 निर्बात थाहर पर पुज्जे दा,
 ए उपमा जितचित्त योगी लेई
 जो आत्म योग च रुज्जे दा ॥ 19 ॥

योगभ्यास ने बज्झा मन
 जेलै बेलाग खड़ोंदा,
 आत्मा गी आत्मा दिक्खी
 सन्दोख आत्मा च होंदा ॥ 20 ॥

बुद्धि ने पांदा अति सुख
 जो इन्द्रियें शा बाहरा
 जित्थे स्थित होई निं करदा ओ
 तत्त ज्ञान शा कदे कनारा ॥ 21 ॥

जिस्सी पाई ओ नेई मिथदा
 होर लाभ कोई बड्डा,
 जित्थे पुज्जी अति भारी दुख बी
 नेई लाह नुआड़ा अड्डा ॥ 22 ॥

ओदा योग नां जानो जिस च
 दुख संजोग बजोग च मुकदा,
 योग ओ करने जोग मनै नै
 पक्कै जो नेई कदे बी उकदा ॥ 23 ॥

हिरसैं सबें गी भलेआं त्यागी
 जो सोचें शा जम्मन,
 इन्द्रिय किट्ट दा मनै ने करियै
 सबनें पासें थम्मन ॥ 24 ॥

बल्लैं बल्लैं बुद्धि धीरज
 आली हरै बिकार,
 मनै गी अपने च स्थिर करियै
 किसै दा बी नेई करै बिचार ॥ 25 ॥

जिस जिस करी भड़कना पांदा
 ए मन चंचल डावांडोल,
 उस उस शा गै डक्कै इस्सी
 करी बस्सै च रक्खे कोल ॥ 26 ॥

पाप मुक्त, मन अति शान्त,
 होआ रजो गुन भलेआं खीन,
 सुख उत्तम पांदा ओ योगी
 जो होए दा ब्रह्म च लीन ॥ 27 ॥

पाप गे जिस दे, जिन्न जोड़ेआ
 योग ने नित अपना सरबन्ध,
 सेहल गै ओ योगी पाई लैदा
 ब्रह्म मिलन दा परमानन्द ॥ 28 ॥

सब जीवें दा अपने च,
 अपने च सब जीवें दा ज्ञान,
 न्है योग जुड़े आपे आले गी
 लब्बन सब्बै इक समान ॥ 29 ॥

जिस्सी अऊं लब्धना सब्बै थाहर,
 सर्व जिस्सी मेरै च लभदा,
 छप्पे दा नेई अऊं उस कोला,
 न ओ मेरे शा छप्पी सकदा ॥ 30 ॥

एकता च टिकी जो मेरा
 कुल जीवें च करदा पूजन,
 सब चाली बरती बी ओ योगी
 करदा मेरे ने गै बरतन ॥ 31 ॥

आत्मा दे रूप च जो
 दिक्खे सब किश इक समान,
 सुख होऐ, भाएं होऐ दुख,
 ओ योगी अति श्रेष्ठ जान ॥ 32 ॥

अर्जुन उवाच

समत्व भाव ने योग दा जो
 कीता, मधुसूदन, तुसें बखान,
 चंचलताई करी नि लभदा
 ढंग मिगी एहदा स्थिरवान ॥ 33 ॥

कृष्ण, ए मन चंचल जिरड़ा,
 जिहल ते बलवान,
 इस दा थम्मन अति औखा
 समझां अऊं बहाऊ समान ॥ 34 ॥

श्री भगवान् उवाच

नेई संशय, अर्जुन, मन चंचल
बड़ी मुशकल ने थम्होंदा
पर बराग ते भ्यास ने, अर्जुन,
ए हत्थै च औंदा ॥ 35 ॥

संजमहीन लेई, मेरा मत,
योग सिद्धि ए अति मुहाल,
आत्मबशी जतनी दे जतनै
ए पाने च होऐ सुखाल ॥ 36 ॥

अर्जुन उवाच

जद योग चा उक्के दे मन आले
श्रद्धालू दा होन्दा जतन भंग,
जो योगहीन उस दी गति दा,
कृष्ण, के होन्दा रंग ढंग ॥ 37 ॥

भगवन, ओ पुरुष बेस्हारा
ब्रह्ममार्ग चा होए दा भ्रष्ट,
तित्तर बित्तर बदलें साईं
क्या होन्दा दौने पासैं नष्ट ॥ 38 ॥

मेरे इस संशय गी केशव
 तुस भलेआं करि सकदे छिन्न,
 लभदा नी मी करने आला
 कम्म ए कोई तुसाढ़े बिन ॥ 39 ॥

श्री भगवान उवाच

पार्थ, नेई इसदा होन्दा नाश
 न इस लोकै च न उत,
 शुभ कर्म कारी दी, प्यारे,
 कदे बी निं होन्दी दुर्गत ॥ 40 ॥

पुत्र कर्मिये दे लोकें च
 ओ केई चिर रमदा,
 योग भ्रष्ट शुद्धाचारी
 श्रीमाने दे घर जमदा ॥ 41 ॥

जां फही ज्ञानवान योगिये
 दे कुल च परतोदा,
 ए पक्का, जन्म नेहा जगै च
 बड़ा गै औखा थोंदा ॥ 42 ॥

साद्धे दा पैहली देह च उत्थे
 बुद्धि संयोग ओ पांदा,
 इस करी फही ओ, कुरु नन्दन,
 जतन सिद्धि लेई लांदा ॥ 43 ॥

उस पैहले योगाभ्यास दे कारन
 ओ स्वतः गै योग च रुझदा,
 योग दा जिज्ञासू ओ जाई
 शास्त्रें शा बी अगगे पुजदा ॥ 44 ॥

योगी पाप धनोए जिस दे
 जतन ने भ्यास च जुड़दा,
 नेक जन्म दी सिद्धि कारन
 परम गति गी पुजदा ॥ 45 ॥

तपियें शा उप्पर योगी
 बदद ज्ञानियें शा वी मन्न,
 कर्मियें शा बी योगी अगगैं,
 इस लेई अर्जुन योगी बन ॥ 46 ॥

सब योगियें चा अन्तः करन
 ने होइ मेरै च रत,
 श्रद्धावान भजदा योगी जो
 मी, ओ परमश्रेष्ठ, मेरा मत ॥ 47 ॥

श्रीमद्भगवद्गीता उपनिषद्, ब्रह्मविद्या ते योगशास्त्र सरबन्धी
 श्री कृष्ण-अर्जुन संवाद च आत्मसंयमयोग नां दा छेमां ध्याऽ
 समाप्त होआ।

...

सतमां ध्याऽ

श्री भगवान उवाच

मेरे स्थारे योग जुड़े दा,
रुज्जे दा मन मेरे ध्यान,
सुन बिन संशय जियां पागा
मेरा पूरा ज्ञान ॥ 1 ॥

इस ज्ञान दा तुगी विज्ञान समेत
दस्सना अऊं भलेआं नचोड़,
जानी जिस्सी नेई फही रौहदी
किश होर जानने दी लोड़ ॥ 2 ॥

ज्हारें माहनुएं चा कोई इक गे
होन्दा सिद्धि लेई जतनकार,
जली सिद्धें चा बी कोई
इक गै पांदा मेरा सार ॥ 3 ॥

पृथिवी, जल, अग्नि, वायु, गास,
मन, बुद्धि ते अहंकार,
ए न बक्खरे बक्खरे मेरी
प्रकृति दे अट्ट प्रकार ॥ 4 ॥

ए अपरा, दूई परा प्रकृति
मेरी दा कर सरबन,
जीव रूप जिस, अर्जुन, इस
जग दा कीते दा थम्मन ॥ 5 ॥

जान इयै जे इयै सबने
जीबें दे होने दा थाहर,
अऊं ऐं सब जगै दा सिरजन,
ते अऊं ऐं इस दा संहार ॥ 6 ॥

नेई किश बी होर, धनंजय,
है मेरे शा उप्पर,
सब मेरे च परोए दा
जियां मनियें आला सूतर ॥ 7 ॥

पुरुषें च अऊं आं पौरुष,
आकाश च अऊं आं धुन,
सब वेदें च अऊं ओंकार,
जलै च, अर्जुन, रसै दा गुन ॥ 8 ॥

तपिएं च अऊं आ तप,
अऊं पृथिवी च शुद्ध बास,
सबने जीवें च अऊं जीवन,
ते अग्नि च तेज दा भास ॥ 9 ॥

अर्जुन, कुल जीवें दा मी
तूं बीज सनातन जान,
बुद्धिमानें दी बुद्धि,
तेज उन्दा जो तेजवान ॥ 10 ॥

बलवानें च अऊं बल
नेई जित हिरस ते लाग, बकार,
अर्जुन, अऊं काम जीवें च
जेहड़े बरतन धर्म अनुसार ॥ 11 ॥

ते पही सात्विक ते राजस ते
तामस भाव न ए जो,
जान ए मेरे शा गै होए,
वो नेई उन्दै च अऊं, मेरै ओ ॥ 12 ॥

इमें त्रिगुनी भावें दे कारन
कुल जग ए भरमोए दा,
इन्दे शा परे अऊं अविनाशी,
जग दा ए ज्ञान खटोए दा ॥ 13 ॥

ए त्रिगुनी मेरी माया दैवी
अति डूहगा इस दा विस्तार,
जेहड़ा लैदे मेरा सहारा
करी जन्दे ए माया पार ॥ 14 ॥

माहनू मूढ़, कुकर्मि, नीच,
आसुरी भावें च गलतान,
नेई पुज्जन मेरै तोड़ी,
माया नै हरेआ उन्दा ज्ञान ॥ 15 ॥

चौं विधियें दे सज्जन, अर्जुन,
करन भक्ति ने मेरा ध्यान,
ओ जो औखा च, जगत दे हिरसी,
ज्ञान इच्छुक, जिन्दे च ज्ञान ॥ 16 ॥

उन्दे चा बी ज्ञानी उत्तम
भजदा नित मन लाई सारा,
अऊं प्यारा अति गै ज्ञानी दा
ते ज्ञानी ऐ मेरा प्यारा ॥ 17 ॥

ए सब्ब उत्तम, पर ज्ञानी
मेरा गै अपना आप बचार,
आत्मा ने जुड़े दा ओ पुजदा
मेरी उत्तम गति दे थाहर ॥ 18 ॥

अनेक जन्में परैन्त
ज्ञानी मी प्राप्त करदा,
वासुदेव गै सब किश समझै,
नेहा महात्मा घट लभदा ॥ 19 ॥

ज्ञान ग्रसे दा केइयें लालसैं
अपने सभाऽ दे प्रेरे दे
होर होर पूजदे देवता
उयै नेई विधियें दे घेरे दे ॥ 20 ॥

जो जो श्रद्धा ने जिस रूप दी
 भक्ति चांहदा करना,
 उस उस च उस प्रति श्रद्धा
 अऊं पक्की चाली भरना ॥ 21 ॥

उस श्रद्धा ने भरेआ ओ
 उस देव दा करदा पूजन मान,
 उस शा पांदा अपनी कामनां
 जिन्दा कीता मैं विधान ॥ 22 ॥

पर मंद बुद्धि आलें दा
 ओ फल होन्दा नाशवान,
 देव पूजी पुजदे देवें श,
 मेरे भगत जो ओ मी पान ॥ 23 ॥

अविनाशी, उत्तम अऊं मेरे
 परम भाव शा रेही अनजान,
 अरूप अऊं मेरा रूप भाव ने
 अज्ञानी करदे अनुमान ॥ 24 ॥

योग माया ने छुपे दा
 नेई अऊं सबने लेई परतक्ख,
 अजन्मा ते अविनाशी अऊं,
 मेरा मूढ़ें गी ज्ञान नि कक्ख ॥ 25 ॥

अऊं जाना जीव जो अगै होने
 ते जो पिच्छैं मे होई,
 ते जो होए दे, पर अर्जुन,
 नेई मी जानै कोई ॥ 26 ॥

दुविधा ते भलेखे कारन
 इच्छा द्वेष शा होए दे
 इस संसार च सब प्राणी,
 अर्जुन, न भरमोए दे ॥ 27 ॥

जिनें पुत्रकर्म लोके दा
 गेदा पाप धनोई,
 द्वन्द्व मोह शा छुड़के ओ
 मी भजदे दृढ़व्रती होई ॥ 28 ॥

जरा, मृत्यु शा बचाऽ लेई
 जो जतन मेरे सहारे करदे,
 ब्रह्म, अध्यात्म ते कर्म तत्त दा
 ज्ञान ओ पूरा बरदे ॥ 29 ॥

अधिभूत, अधिदैव, अधियज्ञ,
 ए सब किश जो मी जानन,
 मेरे ने जुड़े चित्त आले ओ
 मी अन्त समें पच्छानन ॥ 30 ॥

श्रीमद्भगवद्गीता उपनिषद्, ब्रह्मविद्या ते योगशास्त्र सरबन्धी
 श्री कृष्ण-अर्जुन संवाद च ज्ञानविज्ञानयोग नां दा सतमां ध्याऽ
 समाप्त होआ।

• • •

अठमां ध्याऽ

अर्जुन उवाच

ओ ब्रह्म ऐ केह ते केह अध्यात्म,
पुरुषोत्तम, किस्सी आखदे कर्म,
अधिभूत के ऐ ते
अधिदेव दा के ऐ भर्म ॥ 1 ॥

मधूसूदन, अधियज्ञ के इत्ये
जेहड़ा इस देह दे अन्दर,
अन्त लै आत्मबशियें गी कियां
लगदा थुआढ़ा बत्तर ॥ 2 ॥

श्री भगवान उवाच

पर ब्रह्म अक्षर नेई खुरदा,
स्वभाव गी गलान अध्यात्म,
कर्म नां ओदा जेहड़ा सिरजै
जीव ते उन्दा स्वातम ॥ 3 ॥

अधिदैव गै पुरुष जो ब्रह्मा,
अधिभूत पदार्थ न नश्वर,
हे देह धारियें च उत्तम,
अऊं अधियज्ञ देह अन्दर ॥ 4 ॥

अन्त समें करी सिमरन मेरा
 जो देहू गी बरधांदा
 इत च निं बिन्द बी संशय
 ओ मेरे भाव समांदा ॥ 5 ॥

जिस जिस भाव दा चिंतन करदा
 जो बी देहू गी तजदा,
 उस उस भाव च रमे दा अर्जुन
 उस उस भाव च बझदा ॥ 6 ॥

इस लेई सबनैं बेलै कर
 मेरा सिमरन, ते संग्राम,
 मेरे ने लाई मन बुद्धि
 नेई संशय पुजगा मेरे धाम ॥ 7 ॥

अभ्यास योग युक्त चित्त नैं
 जो कुतै होर नेई नसदा,
 करै मेरा चिन्तन, पार्थ, ओ ज़ाई
 दिब्ब परम पुरूख च बसदा ॥ 8 ॥

कवि पुरातन, सर्ब निजन्ता,
 रूप जेदा सोच शा बाहरा,
 सूखम शा सूखम सर्व दा स्हारा
 सूरजबर्न न्हरे शा अगो, करै ओदे

सिमरन दा चारा
 अन्त समें च चित्त अचल नैं,
 भक्ति ते योग दे बल नै
 भवें बशकार शैल प्राण आनी,
 ओ दिब्ब परम पुरुख दा हानी ॥ 9-10 ॥

वेदवान जिसी दसदे अक्खर,
 अलिप्त यति बसदे जिस अन्दर,
 ब्रह्मचर्य पालन इच्छुक जिदे,
 ओ पदवी तुगी दस्सां फुटकर ॥ 11 ॥

रोक लाई सब द्वारें पर
 मनै गी अन्दर डक्की,
 प्राण अपने मत्थे च रक्खी
 योग ध्यान च जम्मी ॥ 12 ॥

ॐ इक्क अक्खर ब्रह्म उचारी
 मेरा सिमरन करदा
 जंदा जो देह छोड़ियै
 ओ परम गति गी बरदा ॥ 13 ॥

सदा निरन्तर इक्क चित्त ने
 मेरै सिमरन लग्गी
 जो नित युक्त योगी उस्सी
 जन्नां अऊं सौखा लब्धी ॥ 14 ॥

पाई परम सिद्धि गी
महात्मा लांदे मेरै डेरा,
दुक्खें दे घर पुनर्जन्म च
नेई भी पांदे फेरा ॥ 15 ॥

ब्रह्म लोक सने सब लोक च
चलदा आवागमन दा चक्कर,
मुकदा पुनर्जन्म, कुन्ति सुत,
आई पुज्जने पर मेरै घर ॥ 16 ॥

हजार युग तोड़ी ब्रह्मा दा दिन,
जान हजार युग इस दी रात,
जो माहनू इस तथ्य गी जानन
उयै जानन रात प्रभात ॥ 17 ॥

दिन होने पर सब जो लभदे
अव्यक्त शा जीवन पांदे,
राती लै उस च लय होन्दे
अव्यक्त न जिस्सी गलांदे ॥ 18 ॥

जीवें दे जत्ये बस इयां
होई होइयै मुकदे,
राती लै होन छपन, अर्जुन,
दिनै लै फही आई दुकदे ॥ 19 ॥

इस अनप्रकटे शा बी उपपर
 सत्ता अनप्रकटे दी जो सनातन,
 कुल सृष्टि दे मुक्कने पर बी
 जेदा नेई होन्दा मुक्कन ॥ 20 ॥

अप्रकट आखदे अक्षर गी
 परम गति उस्सै गी गलांदे,
 उस मेरै परमधाम पुज्जन जो
 ओ नेई फही परती औन्दे ॥ 21 ॥

पुरखा ओ, अर्जुन, उत्तम
 इकचित्त भक्ति ने होन्दा प्राप्त,
 जिस अन्दर सब जीव न बसदे
 जो सारी सृष्टि च व्याप्त ॥ 22 ॥

जिस काल च गेदे योगी
 परतोदे ते जिस च नेई,
 उस काल दा हे, भरत श्रेष्ठ,
 करना बखान अऊं तेरे तैई ॥ 23 ॥

अग्नि, ज्योति, दिन उत्तरी सूरज
 छे म्हीने ते चानना पक्ख,
 इस च जो जन्दे ब्रह्मचारी
 पान ओ माहनू ब्रह्म परतक्ख ॥ 24 ॥

धूं, रात, दक्खनी सूरज
छे म्हीने ते न्हेरा पक्खं,
जाई इत पांदे चन्द्र जोत
ते प्ही फड़दे पिछली बत्त ॥ 25 ॥

मार्ग शुक्ल ते कृष्ण जगत दे
मन्ने जन्दे जो सनातन,
इक राहें गेदा नेई परतोदा,
दूए राहें गेदे भी आगमन ॥ 26 ॥

दोए ए मार्ग जानी योगी
नेई पौंदा, पार्थ, मोह दे जाल,
इस लेई अर्जुन योग साधना
च लग्गा रौह सबनै काल ॥ 27 ॥

वेदें, जग्गें, तपें ते दानें
दा जो ग्लांदे उत्तम फल,
ओ लंघै योगी जानी ए सब
पुज्जै परं सनातन थल ॥ 28 ॥

श्रीमद्भगवद्गीता उपनिषद्, ब्रह्मविद्या ते योग शास्त्र
सरबन्धी श्री कृष्ण-अर्जुन संवाद च अक्षरब्रह्मयोग नां दा अठमां
ध्याऽ समाप्त होआ।

• • •

नौमां ध्याऽ

श्री भगवान उवाच

अकूर्तकी, तेरे लेई आखां
ज्ञान गूढ़, कन्नै विज्ञान,
जानी जिस्सी पा मुक्ति उस शा
जो नेई ऐ शुभ मान ॥ 1 ॥

ए महाज्ञान, ए महागूढ़,
ए उत्तम ते पवित्तर,
परतक्खफली, धर्मयुक्त,
ए सहल ते ए अनश्वर ॥ 2 ॥

परंतप, माहनू नेई जिन्दी
एहके धर्म च श्रद्धा,
मी नेई पाई भड़कन मौती
आले संसार दी बत्ता ॥ 3 ॥

अनप्रकटे मेरे कोला
कुल जग दा होआ बिस्तार,
बसदे मेरे च सब जीब
बो नेई ओ मेरा आधार ॥ 4 ॥

जीबें दा स्हारा सिरजक अऊं
 नेई उन्दा मेरे अन्दर थाहर,
 न अऊं उन्दे अन्दर बस्सां
 दिब्ब जोग मेरा ए बचार ॥ 5 ॥

हर थाहर जियां चलने आला
 नित गास र'वै वायु, महान,
 इयां गै सबनें जीवें दा
 जान तूं मेरै अन्दर स्थान ॥ 6 ॥

कल्पान्त च सब प्राणी
 मेरी प्रकृति च जाई बस्सन,
 कल्पादि च फही, अर्जुन, अऊं
 करना उन्दा सिरजन ॥ 7 ॥

जन समुदाय सबूरा जेहड़ा
 प्रकृति दे बस पवै लचार
 अपनी प्रकृति बर्ती एहदा
 करनां सिरजन बारम्बार ॥ 8 ॥

ते न गै कर्म ए केहड़े
 मिगी, धनंजय, पान पलेस,
 उनें कर्मै प्रति रौहना
 जियां उदासीन निर्लेप ॥ 9 ॥

मेरी प्रधानता च गै प्रकृति दा
जड़ चेतन जग फलदा,
इयै हेतु, अर्जुन, जिस करी
जगत दा चक्कर चलदा ॥ 10 ॥

देह मनुक्खी धारां अऊं
कुल जीवें दा परम पति,
परम भाव मेरा नेई जानन,
न करन मान मेरा अल्पमति ॥ 11 ॥

बृथा आस, बृथा कर्म, ज्ञान बृथा,
जिन्दे चित्त दा नेई कोई ठौर,
राखसी ते आसुरी प्रकृति दे
बस जेहड़ी करदी डौर भौर ॥ 12 ॥

दैवी प्रकृति दे स्हारै,
अर्जुन, जो माहनू महान्
जीवें दा मुँढ अविनाशी जानी,
इकचित्त ने करदे भक्ति गान ॥ 13 ॥

सदा मेरा करदे कीर्तन
दृढ़ व्रतधारी, करन जतन,
नित योग जुड़े मी उपासदे,
भक्ति ने मत्था टेकन ॥ 14 ॥

विश्व रूप मेरे दा केई
 करी ज्ञान यज्ञ ने पूजन
 एक, अनेक जां भिन्न रूप च
 करदे मेरा बन्दन ॥ 15 ॥

अऊं औषध, अऊं श्राद्ध पिण्ड,
 अऊं यज्ञ कर्म, अऊं कर्म श्रौत,
 अऊं मैन्तर, घृत बी अऊं,
 अऊं अग्नि अऊं गै औहत ॥ 16 ॥

अऊं पिता इस जगै दा,
 अऊं माता, ब्रह्मा, पालनहार,
 जानने जोग अऊं ऋक्, साम,
 यजुर, पवित्र ओंकार ॥ 17 ॥

प्रभु, साक्षी, आसरा, स्हारा,
 उपकारी, पुज्जने जोग जो थाहर,
 जीवें दा ठौहर, सनातन बी,
 प्रलय ते सृष्टि दा आधार ॥ 18 ॥

अऊं दिना ताप, अऊं गै करना
 बरखा दा थम्पन ते वर्षन,
 सत बी अऊं, असत बी अऊं,
 अर्जुन, अमृत अऊं, अऊं गै मरन ॥ 19 ॥

त्रिवेदी, सोमपायी, निष्पापी
जगग पूजा मेरी ने सुर्गगति चांहदे
पुत्री ओ इन्द्रपुरी जाई दिब्ब
देव भोग सुर्गे च पांदे ॥ 20 ॥

भोगी सुर्ग विशाल, खीन पुत्र
होने पर मर लोक आई बसदे,
त्रै धर्माश्रित कामना कामी
इयां आवागमन च फसदे ॥ 21 ॥

इक्कै इक्क मेरा करियै सिमरन
जो जन मिगी न ध्यांदे,
रौहन सदा मेरे च, ओ मेरे शा
योग क्षेम न पांदे ॥ 22 ॥

जो बी भक्त होर देवें दा
श्रद्धा ने पूजन करदे,
करदे मेरी गै पूजा ओ
नेई भाएं विधि पर चलदे ॥ 23 ॥

अऊं सब जगें दा स्वामी,
अऊं गै उन्दा भोगी,
तत्त निं मेरा जो पन्थानन
लगदी उनें गी डोबी ॥ 24 ॥

देव, पितर, भूतें गी पूजी
 उन्दे उन्दे श पुजदे
 जो बी मेरी पूजा करदे
 मेरे कोल आई दुकदे ॥ 25 ॥

पत्र, पुष्प, फल, जल मी
 जो भक्ति ने दिन्दा जथा जोग,
 पुरुषार्थी दे भक्ति ने अरपे
 उस दा अऊं लाना भोग ॥ 26 ॥

जो बी करनां, चक्खनां, दिन्नां
 करना तप, जग्ग, हवन,
 सब किश ओ मेरे गै, हे
 कुन्ती दे लाल, तू कर अर्पन ॥ 27 ॥

शुभाशुभ कर्म फल दे
 बन्धन शा छुड़की जागा,
 संन्यास योग च जुड़े दा आत्मा
 भुक्त होइयै मी पागा ॥ 28 ॥

अऊं सब जीबें च समान,
 न कुसै न प्रीत, न कुसै ने द्रोह,
 जो भजदे मी भक्ति भाव ने
 उन्दे च अऊं, मेरे च ओ ॥ 29 ॥

जो भजदा मिगी इकचित्त होई
 भावें अति दुराचारी,
 मन्त्रने जोग ओ साधु गै,
 ओ शुद्ध अटल निश्चयकारी ॥ 30 ॥

तौला गै धर्मात्मा बनदा
 अमर शान्ति च करदा बास,
 अर्जुन, जान ए पक्का मेरे
 भक्त दा नेइऊं होन्दा नास ॥ 31 ॥

स्त्रियां, शूद्र ते वैश्य
 जां जिन्दी बी पाप दी जून,
 मेरा स्तारा लेइयै, अर्जुन,
 ओ बी परम गति गी छूहन ॥ 32 ॥

पुत्री ब्राह्मन, भक्त, राजऋषि,
 इन्दी फही केह आखी गल्ल,
 असुखी, अनित्त, इस लोक च आइयै
 ला अपना चित्त मेरै अल्ल ॥ 33 ॥

कर मेरी मंशा, मेरी भक्ति,
 मेरी पूजा, मी नमस्कार,
 मेरी आढा, मेरे ने लग्गी,
 मेरे कोल तूं पागा थाहर ॥ 34 ॥

श्रीमद्भगवद्गीता उपनिषद्, ब्रह्मविद्या ते योग शास्त्र सरबन्धी
 श्री कृष्ण-अर्जुन संवाद च राजविद्याराजगुह्ययोग नां दा नौमां ध्याऽ
 समाप्त होआ।

• • •

दसमां ध्याऽ

श्री भगवान उवाच

हे महाबाहो, सुन अगगै फही
मेरे परम बचन,
जो आक्खां तेरे हित इच्छा ने,
तू प्रीति भरोचा जन ॥ 1 ॥

मेरी उत्पत्ति गी
न महर्षि, न सुरगन जानन,
देवें ते महर्षियें दा अऊं
सब चाली आदि कारन ॥ 2 ॥

अनादि, अजन्मा मी जो
लोकें दा परमेशर मन्नै,
ज्ञानी ओ मनुक्खें च
होन्दा सब पापें शा बन्नै ॥ 3 ॥

बुद्धि, ज्ञान, चतुराई,
क्षमा, सत्य ते भय, अभय,
सुख दुख दे कन्नै दम शम,
जग दी उत्पत्ति ते प्रलय ॥ 4 ॥

अहिंसा, समता, ते संतोष,
 दान, तपस्या, जस, अपजस,
 जीबें दे नेक प्रकार दे भाव
 होन्दे मेरे शा गै सिरजत ॥ 5 ॥

सप्त ऋषि ते उन्दे पैहलैं
 चौदां मनुएं गी जान
 मेरे भाव गै मनैं चा सिरजै
 लोक न ए जिन्दी सन्तान ॥ 6 ॥

मेरे इस विभूति योग दे
 ततैं च जो गुढ़दा,
 नेई संशय इत अचल योग ने
 मेरे नैं आई ओ जुड़दा ॥ 7 ॥

अऊं सबनें दा सिरजनहार,
 मेरे करी होन्दी सब कार,
 ए जानी भजदे मी ज्ञानी
 मेरे भाव च लाई बचार ॥ 8 ॥

मेरें गी इक दूए ने दस्सन,
 मेरै च प्रान मेरै च चित्त,
 रमन मेरै च पान सन्दोख,
 मेरी चर्चा करदे नित्त ॥ 9 ॥

प्रीति भाव ने जपन निरन्तर
 लग्गे दे जो मेरै ध्यान,
 देआं उन्दे लेई बुद्धि योग
 ओ जेदे ने मेरै गी पान ॥ 10 ॥

उन्दे पर होई दयाल, जो
 अज्ञान चा उग्गेआ अन्धकार
 अऊं बैठा अन्दर ओदा उज्जल
 ज्ञान दीप ने करां संहार ॥ 11 ॥

अर्जुन उवाच

परं ब्रह्म, परं धाम,
 तुस ओ परम पवित्तर,
 पुरुष सनातन दिब्ब अजन्मा,
 आदि देव सर्वत्तर ॥ 12 ॥

देवर्षि नारद, असत, व्यास,
 देवल, ए सबनें ऋषिएं दा उचार
 तुन्दे लेई, आपूं बी तुसैं मी
 दस्सेआ इयै केहड़ा सार ॥ 13 ॥

जो बी तुस दस्सो, केशव,
 मन्नां ओ अऊं सच्च प्रमान,
 न गै दानवें न गै देवें गी, प्रभु,
 थुआड़े रूप दा ज्ञान ॥ 14 ॥

पुरुषोत्तम, अपने आपा दे
 तुस आपूं गै जाननहार,
 हे जगन्नाथ, हे देव देव,
 हे भूतेश्वर, हे सृष्टिकार ॥ 15 ॥

अपनी दिब्ब विभूतियें दा
 तुस्सै करी सकदे पूरन बखान,
 लोकैं इनें च व्याप्त थुआड़ी
 विभूतियें करी ए स्थिरता पान ॥ 16 ॥

कियां अऊं जाना तुगी, योगी,
 नित्त तेरा चिन्तन करियै,
 जपां तुगी अऊं, हे भगवन,
 कु'न कु'न भावें गी मन धरियै ॥ 17 ॥

प्रभु, दस्सो फही अपनी योग विभूति
 जियां मेरे शा समझोंदी,
 सुनि सुनि थुआड़ी अमृतबानी
 नेई मेरी तृप्ति होन्दी ॥ 18 ॥

श्री भगवान उवाच

हुन अपनी दिब्ब विभूतियें दा
 तुगी दस्सनां मुट्टा मुट्टा सार,
 कुरु श्रेष्ठ, मेरे विस्तार दा
 लभदा नेई कुतै बी पार ॥ 19 ॥

अऊं आत्मा, अर्जुन, जेहदा
सबनें जीबे अन्दर थाहर,
अऊं जीबे दा आदि अन्त,
अऊं ऐं गै उन्दा बशकार ॥ 20 ॥

आदित्ये च अऊं विष्णु,
ग्रैहे च सूरज किरनवान,
मरुते च अऊं मरीचि,
चन्न मी नक्षत्रे च जान ॥ 21 ॥

इन्द्रिये च अऊं आं मन,
सामवेद अऊं वेदे च,
जीवे अन्दर अऊं चेतना,
अऊं इन्द्र आं देवे च ॥ 22 ॥

बसुएं च अग्नि अऊं,
रुद्रे च अऊं महेश,
पर्वते च अऊं सुमेरू,
यक्ष राक्षसे च धनेश ॥ 23 ॥

पुरोहिते च मुखिया
मी, अर्जुन, बृहस्पति जान,
सेनापतिये च कार्तिक,
सागर उन्दे च जो जलवान ॥ 24 ॥

महर्षिये च भृगु अऊं,
अक्खरें च अक्खर ओंकार,
यज्ञें च जप यज्ञ, हिमालय
उन्दे च जो स्थित इक थाहर ॥ 25 ॥

देव ऋषियें च अऊं नारद,
सब रुक्खें च पिप्पल,
गन्धर्वें च चित्ररथ,
ते सिद्धें च मुनि कपिल ॥ 26 ॥

घोड़ें च उच्चैःश्रवा
जो अमृत दी संतान,
गजराजें च अऊं ऐरावत,
नरें च मी नराधिप जान ॥ 27 ॥

गवें च अऊं कामधेनु,
शस्त्रें च अऊं बज्जर,
सिरजकें च अऊं कामदेव,
वासुकि उन्दे च जो विषधर ॥ 28 ॥

वरुण उन्दे च जो जलचर,
नागें च अनन्त नाग,
पितरें च अऊं अर्यमा,
शासन कर्ते च यमराज ॥ 29 ॥

काल स्थाव रखने आलें च,
 दैत्यें च आं अऊं प्रह्लाद,
 पक्खरुएं च अऊं गरुड़,
 पशुएं च अऊं मृगराज ॥ 30 ॥

मच्छियें च अऊं मगरमच्छ,
 राम अऊं शस्त्र धारियें च,
 नदियें च अऊं आं गंगा,
 पवन पवित्तरकारियें च ॥ 31 ॥

आदि अन्त ते बशकार
 अऊं आं, अर्जुन, सृष्टि दा,
 वाद विवादकारियें च,
 विद्याएं च अध्यात्म विद्या ॥ 32 ॥

अऊं ओंकार आं अक्खरें च,
 समासें च अऊं द्वन्द्व समास,
 विराट् रूप अऊं गै पालक,
 अऊं ओ काल नेई जिस दा नास ॥ 33 ॥

सर्व गी हरने आला मृत्यु,
 होनें आलें दा अऊं बी,
 स्त्रियें च कीर्ति, स्मृति, वाक्,
 मेधा, धृति, क्षमा ते श्री ॥ 34 ॥

सामें च अऊं बृहत्साम,
छन्दें च गायत्री छन्द,
मासें च अऊं मार्गशीर्ष,
ऋतुएं च अऊं ऋतु बसन्त ॥ 35 ॥

जूआ छलियें च, अऊं तेज
तेजवानें च, अऊं विजय,
सात्विक भाव अऊं सात्विक
माहनुएं च, अऊं निश्चय ॥ 36 ॥

पाण्डवें च अऊं अर्जुन,
वासुदेव वृष्णियें च,
कवियें च अऊं शुक्राचार्य,
वेद व्यास अऊं मुनियें च ॥ 37 ॥

विजय लालसियें दी नीति,
दण्ड दमन कारियें दा,
मौन आं अऊं रहस्यें च,
ज्ञान अऊं ज्ञानधारियें दा, ॥ 38 ॥

अऊं ओ बी, अर्जुन, जेदे चा
सब जीबें दा होऐ सिरजन,
जड़ जेतन नेई कोई सत्ता
जो होन्दी होऐ मेरै बिन ॥ 39 ॥

मेरी दिब्ब विभूतियें दा
 नेई ऊं, अर्जुन, पौंदा पार,
 संक्षेप च कीता तेरे लेई
 में विभूतियें दा बिस्तार ॥ 40 ॥

जो जो बी है वस्तु शक्ति
 शोभा ते ऐश्वर्य सम्पन्न,
 उस उस गी तू जान मेरे
 तेज अंश चा होई उत्पन्न ॥ 41 ॥

ते फही तेरा मता होर
 जानना ऐ कित कम्में दा,
 अऊं आं अपने इक अंशमात्र ने
 जिन्न ए कुल्ल जग थम्मे दा ॥ 42 ॥

श्रीमद्भगवद्गीता उपनिषद्, ब्रह्मविद्या ते योगशास्त्र
 सरबन्धी श्री कृष्ण-अर्जुन संवाद च विभूतियोग नां दा दसमां अध्याऽ
 समाप्त होआ।

...

जारमां ध्याऽ

अर्जुन उवाच

मेरे पर करी किरपा मेरे लेई
परम गूढ़ अध्यात्म ज्ञान
जो दित्ता तुसें उस कारन मेरे
भरमैं दा नेई रेहा नशान ॥ 1 ॥

कमल नेत्र, अमिट म्हातम थुआड़ा,
जीबें दा होन ते सम्मन,
में बड़ी गै चंगी चाली
थुआड़े शा कीता शरवन ॥ 2 ॥

परमेशर, तुस अपने आप गी
जियां दस्सो सो गै ठीक,
रूप ऐश्वर्यमान, पुरुषोत्तम,
थुआड़ा दिक्खने दी मी हीख ॥ 3 ॥

जे जानो तुस रुप थुआड़ा
दिक्खने च अऊं सरमत्य,
योगेश्वर, तां अविनाशी अपना
ओ मेरे लेई करो परतक्ख ॥ 4 ॥

श्री भगवान उवाच

दिक्ख पार्थ तूं दिक्ख मेरे
केई सैंकड़ें ते हज़ार
रूप नेक रंगें ढंगें दे
जिन्दे बिबिध प्रकार ॥ 5 ॥

दिक्ख आदित्य, मरूत, रुद्र,
वसु ते अश्वनि कुमार,
अन दिक्खे केई पैहलें दिक्ख,
अर्जुन, जो चरजै दा थाहर ॥ 6 ॥

इक थाहर होई दी किट्ठी
कुल सृष्टि जड़ ते चेतन,
अर्जुन, दिक्ख अज मेरी देह च
ते दिक्ख होर बी जो तेरे मन ॥ 7 ॥

दिब्ब दृष्टि दिन्ना तुगी, मेरे
योग ऐश्वर्य दा दर्शन कर,
तेरे इनै नेतरैं ने अऊं
नेई होई सकदा दृष्टिगोचर ॥ 8 ॥

संजय उवाच

ए आक्खियै, राजन, हरि ने,
जो ऐ योगेश्वर महान,
अर्जुन गी फही दर्शाया
परम रूप ऐश्वर्यवान ॥ 9 ॥

जेदे रूप अनेक न्यारे
अनेक नेत्र ते वक्त्र,
दिब्ब भूषन अनेक न जेदे,
जिस अनेक गूरे दे शस्त्र ॥ 10 ॥

दिब्ब गन्ध दा होए दा लेपन,
धारे दिब्ब बस्तर दिब्ब माला,
जिस दे मुख न सबनी बक्खी
अनन्त देव सब चर्जे आला ॥ 11 ॥

ज्हारें सूरजें दे गासै किट्टे
चढ़ने पर होऐ जो तेज दा भान,
ओ खबरै गै होई सक्कै
इस महात्मा दे तेज समान ॥ 12 ॥

दिक्खी अर्जुन देवेश दे देह च
स्थित होई दी इक्कै थाहर
कुल सृष्टि भी, होई दी
जेदी बंड अनेक प्रकार ॥ 13 ॥

अर्जुन दे उब्बरे सरकंडे,
 चजै च ओ गेआ धिरी,
 हथ जोड़ी सिर नीमां करियै
 उस बोले ए बोल भिरी

॥ 14 ॥

अर्जुन उवाच

दिक्खां, देव, तेरी देह च
 जीव समूह, अनेक देव गन,
 दिब्ब सर्प, ऋषि सब्बै, शिव,
 ब्रह्मा बैठा कमल दे आसन
 अनेक बाहू, मुख, उदर, नेत्र,
 न अन्त, न मध्य न आदि तेरा,
 दिक्खां, विश्वरूप, विश्वेश्वर
 तेरा रूप, अनन्त चफेरा

॥ 15 ॥

॥ 16 ॥

गदा, चक्र, मुकुट धारी, तेज पुंज,
 दीप्त अग्नि, सूर्य जियां ज्वालवंत,
 दिक्खां चौनीं बक्खी जो नेई दिक्खन जंदा,
 पाई नेई सकदी बुद्धि कदे वी जेदा अन्त

॥ 17 ॥

तू अक्षर परम जानने जोग,
 तू इस विश्व दा परमाधार,
 तू अविनाशी, नित, धर्मरक्षक,
 तू पुरुष सनातन, मेरा बिचार

॥ 18 ॥

नेई आदि, मध्य, अन्त, जेदा बिक्रम अनन्त,
 अनेक बाहू, चन्द्र सूर्य जेदी दृष्टि,
 दिक्खां अऊं तेरा मुख ज्वालवंत,
 तेज अपने ने जो तपांदा सृष्टि ॥ 19 ॥

तूँ गै तूँ सबनी बक्खी
 पृथिवी ते अम्बर बशकार,
 उग्र, अब्हुत रूप ए दिक्खी तेरा
 त्रिलोकी, प्रभो, पा दाह अपार ॥ 20 ॥

ए देव समूह तेरे च समाई
 किश डरे दे हत्थ जोड़ी गुन गांदे,
 महर्षि, सिद्धगन स्वस्ति बाची
 उत्तम स्तुतियें ने तुगी ध्यांदे ॥ 21 ॥

रुद्र, आदित्य, बसु, साध्यगन,
 पितर, विश्वदेव, अश्वनि, मरुत,
 गन्धर्व, यक्ष, असुर सिद्ध संघ,
 दिक्खन सब तुसैं गी चर्ज युत ॥ 22 ॥

अनेक मुख, नेतर, उदर, बाहू,
 पैर, जंघां ते दन्द कराल,
 ए रूप महान दिक्खियै थुआड़ा, प्रभु,
 लोक ते अऊं ब्याकुल बेहाल ॥ 23 ॥

छूऐ अम्बर, ज्वलित रूप नेक रंगी,
 फैले दा जात, नेत्र विशाल अग्गी दे डारे,
 दिक्खी तुसें गी अन्तरात्मा होन्दा व्याकुल,
 हे विष्णो, मैं धीरज ते शान्ति हारे ॥ 24 ॥

दिक्खी थुआड़े मुख, दन्त बिकराल
 मकदे काल अग्नि समान,
 दिशा ज्ञान नेई रेहा, न शान्ति,
 जगव्यापी प्रभु, हो कृपावान ॥ 25 ॥

ए सब्बैं धृतराष्ट्र दे सुत,
 कन्नै राजाएं दी टोली,
 भीष्म द्रोण ते सूतपुत्र,
 साढ़े मुख योधा, हमजोली ॥ 26 ॥

पौन आई थुआड़े मुंह फट फट
 जित्थे दन्द अति भयकारी, क्रूर
 दन्दें दी द्रेड़ैं किश फसे दे लब्बन
 सिर जिन्दे न चूरो चूर ॥ 27 ॥

नदियें दे जियां प्रवाह केई
 बेग ने सागर अल्ल नसदे
 इयां गै धरती दे बीर थुआड़े
 बलदे मुखें च जाई धसदे ॥ 28 ॥

जियां मकदी ज्वाला च पतंगे
 अति बेग ने नाश लेई बड़दे,
 लोक इयां तुंदे मुखें च नाश तैं
 बड़े तमामा ने दड़दे ॥ 29 ॥

ज्वलित मुखें नें ग्रसि कुल लोक
 चबक्खी तुस उनें गी चट्टा करदे,
 फैले दे उग्र प्रकाश तुन्दे करी
 जगै च सब ताप न जरदे ॥ 30 ॥

दस्सो मी उग्र रूप तुस कुन ओ,
 नेई जानां थुआड़ा ब्यहार विचार
 जाननां चांह थुआड़ा आदि रूप,
 प्रभु, तुष्टो तुसें गी नमस्कार ॥ 31 ॥

श्री भगवान उवाच

लोक नाश लेई महाकाल
 अऊं लगां करन लोक संहार,
 बिन तेरे बी निं रौहने ए योधा
 बैरी सेना च जिन्दा थाहर ॥ 32 ॥

इस लेई उठ, पा यश, जित्त बैरी,
 समृद्ध राज दा बन तू पात्र,
 मारे गेदे ए मेरे शा पैहलैं गै,
 बन, सव्यसाची, निमित्त मात्र ॥ 33 ॥

द्रोण ते भीष्म, कर्ण ते जयद्रथ,
 शूरवीर केई होर, बो नेई डर,
 मार इन्हें गी जो मारे मैं,
 जितगा बैरी रनै च, युद्ध कर

॥ 34 ॥

संजय उवाच

कृष्ण बचन ए सुनि मुकुटी ने
 कम्बी, कर जोड़ी करी नमस्कार,
 गदगद होई डरदे फही ए
 कृष्ण गी नमीं कीता उचार

॥ 35 ॥

अर्जुन उवाच

ठीक गै, प्रभो, तेरी कीर्ति करी
 जग होन्दा हर्षित, श्रद्धा पांदा,
 डरी नसदे निशाचर सब बक्खी,
 सिद्ध संघ कुल सीस नुआंदा
 जो सत् असत् शा परे तुस अक्षर,
 सर्वश्रेष्ठ, ब्रह्मा दे बी कारन,
 अनन्त, देवेश, जगन्निवास,
 फही की निं, प्रभो, ओ करन तेरा बन्दन

॥ 36 ॥

॥ 37 ॥

तुस आदि देव पुरुष पुरातन,
 तुस इस विश्व दे परमाधार,
 ज्ञाता, ज्ञान जोग, परमधाम,
 अनन्त रूप, जग तुन्दा बिस्तार ॥ 38 ॥

वायु, यम, अग्नि, वरुण, चन्द्रमा,
 तुस प्रजापति, ब्रह्मा दे बी ब्रह्मा,
 हजार बार नमोनमः तुसेंगी,
 फही फही तुसेंगी नमोनमः ॥ 39 ॥

नमः अगुआं ते पिच्छुआं तुसेंगी,
 सर्वस, तुसें गी नमः चफेरै,
 अनन्त प्रताप, अति बिक्रम थुआड़ा,
 सब किश तुस, सब तुन्दे घेरै ॥ 40 ॥

मिथी संगी, तुन्दी मैहमा बिन जाने
 हठा ने जो कीता मैं उचार
 'हे कृष्ण, हे यादव, हे सखे' करियै,
 ओ भुल्ल सेही मेरी जां प्यारा ॥ 41 ॥

जो बी थुआड़ा होआ नरादर
 हास, बिलास, बौहने, खाने च,
 इक्कले जां होरनें अगै,
 प्रभो अचिन्तय, अऊं बखशाने च ॥ 42 ॥

पिता तुस इस जड़ चेतन जग दे,
गुरु राज, अतुलित प्रभाव, पूजा दे जोग,
नेई थुआड़े नेहा त्रलोकी च दूआ,
फही थुआड़े शा बद् कु'न होग ॥ 43 ॥

इस लेई करी प्रणाम, देहू गी थुआड़ै चरनै चाढ़ी,
स्तुति जोग तुसें गी बंदां, प्रभु, पाने लेई कृपा थुआड़ी,
पिता पुत्र दे, मित्र मित्र दे, प्रिय प्रिया दे जियां
इयां गै प्रभु तुस मेरे अपराध दोष लेओ सहारी ॥ 44 ॥

अनदिक्खा पहलै दिक्खियै खुश
भय ने बी व्याकुल मेरा मन,
देवेश, जगतव्यापी, करो किरपा,
देओ फही उयै देव दर्शन ॥ 45 ॥

मुकुट, गदा, चक्र, हथ थुआड़े,
इयै अऊं दिक्खना चाहनां,
हे सहस्रबाहो, विश्व रूप,
बनाओ चतुर्भुज रूप दा बाना ॥ 46 ॥

श्री भगवान उवाच

होई, अर्जुन, प्रसन्न विश्व रूप अति तेजवन्त,
सब दा आदि अनन्त मैं तूई दर्शाया
अपने योग ने जो ओ पहलै
कदे नी कुसै दी नजरी आया ॥ 47 ॥

न वेद, न जग्ग, न दान, न कर्म,
 न पठन पाठन, न तप कठोर
 ने दिक्खी सकदा नर लोक च, पार्थ,
 ए रूप मेरा तेरे छुट होर ॥ 48 ॥
 मेरे इस घोर रूप गी दिक्खी
 न हो भयभीत, न गे मूढ़ बन,
 होई निरभौ, प्रीति ने फही तूं
 मेरे उस रूप दा कर दर्शन ॥ 49 ॥

संजय उवाच

अर्जुन गी ए आखी कृष्ण ने
 फही रूप अपना दस्सेआ इक बारी,
 डरे दे उस्सी देई दलासा
 लेआ सौम्य शरीर फही धारी ॥ 50 ॥

अर्जुन उवाच

थुआड़े इस शान्त नर रूप दी मेरी
 दृष्टि च, जनार्दन, जो पेई छाप,
 आई उठी मेरै मनै च चुस्ती,
 पाई लेआ मैं अपना आप ॥ 51 ॥

श्री भगवान उवाच

अति दुर्लभ रूप मेरा
जिस दा तूं कीता दर्शन,
देवता बी रूप ए केहड़ा
दिक्खने लेई नित तरसन ॥ 52 ॥

न तप, न दान, न करियै जग,
न पढ़ियै बेदे दी विद्या
दिक्खन जन्दा ऐ रूप मेरा
जियां, अर्जुन, तूं इस्सी दिक्खेआ ॥ 53 ॥

इस भाव ने इंयां, अर्जुन,
मेरी भक्ति च रस्सना
करे सुखल्ला मेरा दर्शन,
तत्त ज्ञान, मेरे च बस्सना ॥ 54 ॥

निशंग भक्त मेरा मेरै च लगा
मेरै लेई सब कम्म करदा,
सबनें जीबे दा निबैरी
मेरे नै अर्जुन आई रलदा ॥ 55 ॥

श्रीमद्भगवद्गीता उपनिषद्, ब्रह्मविद्या ते योगशास्त्र सरबन्धी
श्री कृष्ण-अर्जुन संवाद च विश्वरूपदर्शनयोग नां दा जारमां ध्याऽ
समाप्त होआ।

• • •

बाहरमां ध्याऽ

अर्जुन उवाच

इंयां नित तेरै लग्गी जो
भक्ति ने तेरा करदे गान,
ते जो अक्षर अनप्रकटा ध्यांदे,
इन्दे चा कुस्सी योग ज्ञान ॥ 1 ॥

श्री भगवान उवाच

अति श्रद्धा ने भरोचे दे
चित्त मेरै च डोबी
जो नित मेरै ध्यान च लग्गे
मन्त्रे जन्दे ओ उत्तम योगी ॥ 2 ॥

अनदस्सा, अनदिक्खा, अचल,
जो रौहदा इक समान
परें सोच शा, सबने थाहर,
अक्षर, एहदा करन जो ध्यान ॥ 3 ॥

इन्द्रियै दे गुटै गी ब'न्नी
दिक्खन सबनें गी इक समान,
कुल जीबै दे हितै च लग्गे
ओ सब मेरे गी गै पान ॥ 4 ॥

औख बड़ी उन्दे लेई जिन्दा
 निराकार दे पिच्छें मन,
 निराकार तोड़ी पुज्ज पानी
 देह धारियैं लेई कठन ॥ 5 ॥

कर्म सबूरे मिगी सौंपियै
 लाइयै मेरै ने गै लगन
 जो अडोल दृढ़ योग ने फही
 मी ध्यांदे लाई मेरै च मन ॥ 6 ॥

मेरै च जो रुज्झे जेहूडे
 करियै चितै गी इक थाहर,
 तुरत, पार्थ, अऊं उनें ई करना
 मृत्यु संसार सागर शा पार ॥ 7 ॥

मनै दी लाई मेरै ने लाग,
 बुद्धि आनी मेरै कोल,
 आई मेरै च करगा बास,
 इत्त च नेई बिन्द बी घरमोल ॥ 8 ॥

जे मेरै च नेई लाई सकदा
 चित्त संभालियै इक थाहर,
 भ्यास योग ने तां, अर्जुन, मी
 पाने दा बन इच्छाकार ॥ 9 ॥

भ्यास दी बी जे नेई सरमत्या
 तां फही कर मेरे लेई कर्म,
 करदे होई कर्म मेरे लेई
 पाई लैगा सिद्धि दा मर्म ॥ 10 ॥

जे ए बी तेरे लेई मुशकल
 तां पा मेरे योग ने जोड़,
 आपूं गी कर बस अपने,
 सबनें कर्म फलें गी छोड़ ॥ 11 ॥

है भ्यास शा ज्ञान उप्पर,
 ज्ञान शा उप्पर ध्यान दी माहल,
 ध्यान शा उच्चा कर्म फल त्याग,
 त्याग करी शान्ति तत्काल ॥ 12 ॥

सब जीबें ने बिना द्वेष,
 सबनें दा हिती ते दयावान,
 न ममता न अहंकार,
 क्षमावान, सुख दुख समान ॥ 13 ॥

नित सन्दोखी, योगी दृढ़ निश्चै
 जिस कीता अपने बसै दा चारा,
 मन बुद्धि मेरै च अर्पित,
 ओ मेरा भगत, ओ मेरा प्यारा ॥ 14 ॥

लोग निं जिस शा कुढ़दे, जो न
 लोकें लेई कुढ़तन दा मारा,
 न हसद, भय, तुशीं, न गै.
 जो पसोऐ सो मेरा प्यारा ॥ 15 ॥

बेहिरसा, शुद्ध, चतर, निरपक्खी,
 दुखें दा जिस कीता नपटारा,
 कर्तापन दा मान निं जिस्सी,
 ओ मेरा भक्त, ओ मेरा प्यारा ॥ 16 ॥

न उम्बलदा, न करदा द्वेष,
 न दुख पांदा, हिरसें शा न्यारा,
 शुभ ते अशुभ दित्ता जिस त्यागी,
 भक्तिवान जो ओ मेरा प्यारा ॥ 17 ॥

जिस ने त्यागी सारी लाग,
 शत्रु मित्र ते मान अपमान,
 गर्मी सदीं ते सुख दुख,
 सब्बै जिस लेई इक समान ॥ 18 ॥

निन्दा, मान समान, सन्दोखी
 जो बी बतैं औखा भारा,
 स्थिर मति, कुसै ठौर नेई बज्झा,
 भक्तिमान जन मेरा प्यारा ॥ 19 ॥

इयां दस्से दा धर्म अमृत ए
श्रद्धा ने होइयै मेरे स्हारै
सेवन करदे भगत जो मेरे
भगत मिगी ओ न अति प्यारे

॥ 20 ॥

श्रीमद्भगवद्गीता उपनिषद्, ब्रह्मविद्या ते योग शास्त्र
सरबन्धी श्री कृष्ण-अर्जुन संवाद च भक्तियोग नां दा बाहरमां ध्याऽ
समाप्त होआ।

• • •

तेहरमां ध्याऽ

श्री भगवान उवाच

ए जो शरीर, हे अर्जुन,
नां क्षेत्र इस दा गै पांदे,
जो जाने इस्सी क्षेत्रज्ञ खुआंदा,
तत्त ज्ञानी इयै गै गलांदे ॥ 1 ॥

सबनें क्षेत्रें च, अर्जुन,
मी गै तूं क्षेत्रज्ञ पन्छान,
ज्ञान क्षेत्र क्षेत्रज्ञ दा जो
ज्ञान ऊयै, मत मेरा जान ॥ 2 ॥

जो ए क्षेत्रज्ञ, ते जियां, ते जो
एहदे विकार, ते एहदा कारन कु'न,
ते जो क्षेत्रज्ञ, जो एहदा प्रभाव,
संक्षेप ने तूं मेरे शा सुन ॥ 3 ॥

भिन्न-भिन्न छन्दें च ऋषियैं
नेक भांति ने गाए दा,
ब्रह्मसूत्र दे पृथक् पदें च
जुगति ने निश्चै कराए दा ॥ 4 ॥

मूल प्रकृति ते बुद्धि,
 महाभूत ते अहंकार,
 इन्द्रियां दस ते इक,
 पञ्च इन्द्रिये दे विषय बिकार, ॥ 5 ॥

इच्छा, द्वेष, सुख, दुख, देह पुञ्ज,
 चेतना, धारना दृढ़वान,
 ए सार क्षेत्र दा सनै बिकारै,
 एदा गै कीता बखान, ॥ 6 ॥

शुद्धता, स्थिरता, आत्म संयम,
 अहिंसा, क्षमा, सरलताई,
 गुरुपूजा, पखंडहीनता,
 ते नां गै अपनी बड़ेआई ॥ 7 ॥

इन्द्रिय विषयै लेई बेहिरसी
 ते नां गै होऐ अहंकार,
 जन्म, मरन, जरा रोग दे
 दुख दोषे दा शैल बचार ॥ 8 ॥

पुत्तर, त्रीमत, घर कुल्ले
 आदि च बेलागी, नेई ममता,
 औखै सोखै बेलै म्हेशा
 र'वै बनी दी चित्त दी समता ॥ 9 ॥

अटल योग ने रेही मेरै च
 भक्ति छड़ी मेरे इक्कै दी,
 एकान्त थाहर रौहने दी बृत्ति,
 नेई चाह भीड़ भड़क्के दी ॥ 10 ॥

अध्यात्म ज्ञान च लाग सदा,
 तत्त ज्ञान दे अर्थ दा ज्ञान,
 इस्सै गी ज्ञान करी आखन,
 इसदे जो विपरीत, अज्ञान ॥ 11 ॥

जानने जोग जो आखां ओ
 जिस्सी जानी होन्दा अमृतपान,
 अनादी ब्रह्म परे जो सब शा
 जिस्सी न 'सत्' न 'असत्' गलान ॥ 12 ॥

सब पासैं हथ्य पैर न उसदे,
 सब पासैं सिर मुंह अक्खीं,
 कन्न न उसदे सबनी भेठा,
 ओ रौहदा मल्लियै सब्बै बक्खीं ॥ 13 ॥

सर्व इन्द्रियै दे गुन जों जानै
 पर नि इन्द्रियै नैं जेहदा जोग,
 निर्लेप फही बी सब दा पालक,
 निर्गुन बो करै गुनें दा भोग ॥ 14 ॥

उयै अचल ते उयै चल,
 जीबें दे अन्दर ते बेहड़ै,
 अति सूखम ज्ञान शा बाहरा,
 उयै दूर ते उयै नेड़ै ॥ 15 ॥

अनबंडा जीबें च ओ
 बंडोए दा जन लभदा,
 जानने जोग ओ जीबें दा
 कर्ता, धरता ते हरता ॥ 16 ॥

लोइयै दी लो, अति परे,
 न्हरे शा जिस्सी आखन,
 ओ ज्ञान, ज्ञान जोग थोए ज्ञान नै
 सर्ब दे हृदय च ओदा आसन ॥ 17 ॥

क्षेत्र, ज्ञान, ते ज्ञान दे जोग,
 जेह्दी इयां दस्सी सार गल्ल,
 मेरा भक्त जानियै उस्सी
 मेरे रूप दी मारदा मल्ल ॥ 18 ॥

प्रकृति ते पुरुष बस
 जानी ले अनादि दोए,
 बिकारें ते गुनें दा सिरजन
 जान प्रकृति शा होए ॥ 19 ॥

कार्य कारण दी कड़ी गलांदे
 प्रकृति दी गै करनी,
 पुरुष अपनी करतूतें भरदा
 सुखै दुखै दी भरनी ॥ 20 ॥

प्रकृति ने लगा पुरुष भोगदा
 गुन जिन्दा ओ सूंदी सून,
 गुनै नैं संग होनें दे कारन
 स्हेड़दा चंगी मंदी जून ॥ 21 ॥

इस्सी दस्सन साक्षी, धाता, भोक्ता,
 महेश्वर, परमेशर, मति दाता,
 इस देह च होन्दे होए बी
 नेई पुरुष दा इस ने नाता ॥ 22 ॥

पुरुष ते प्रकृति दी गुनें कनै
 जो इयां मत्त पांदा,
 सब कम्म करदे बी नेई ओ
 फही जन्म दा गेड़ा लांदा ॥ 23 ॥

ध्यान अंपने ने अपने च
 पांदे किश आत्मा दा लशकारा,
 ज्ञान योग दा लैदे किश
 ते कर्म योग दा किश स्हारा ॥ 24 ॥

पर बाकी जो ए नेई जानन
 सुनि दूएँ शा भक्ति करदे,
 श्रोता बने दे ओ बी इयां
 पक्क मृत्यु गी तरदे ॥ 25 ॥

स्थावर, जङ्गम जिस बी
 सत्ता दी, अर्जुन, होन्दी रचना,
 क्षेत्र क्षेत्रज्ञ दे मेल करी
 सुन ओ घटदी घटना ॥ 26 ॥

नाश होआ दे सब जीबै च
 परमेश्वर अनाशवान
 जो दिक्खै समभाव ने बैठे दा,
 उस्सै गो होन्दी पन्छान ॥ 27 ॥

की जे दिक्खै ओ स्थित सबनें च
 प्रभु जो सब लेई इक समान,
 नेई आपूं अपना करदा नाश
 इस लेई ओ पा परम कल्याण ॥ 28 ॥

प्रकृति सब कम्म करने आली,
 आत्मा अकर्ता जानै
 जो माहन् समझो उयै गै
 असली तत्थ पछानै ॥ 29 ॥

जेलै नेक रूपी जीबै दा
दिखदा ओ इक्क आधार,
ते विस्तार उस्सै चा इन्दा
जाई पुजदा ओ ब्रह्मं दे थाहर ॥ 30 ॥

आत्मा अविनाशी, अर्जुन,
भावे देह च रौहन्दा,
निर्गुन ते अनादि ए
न करदा न लपटोंदा ॥ 31 ॥

होइयै बी सबनै थाहर जियां
निर्लेप र'वै सूखम अम्बर,
निर्लेप इयां गै आत्मा जो
सब थाहर र'वै देह अन्दर ॥ 32 ॥

जियां कल्ला सूरज इस
कुल सृष्टि च लो करदा,
अर्जुन क्षेत्री इयां गै
लो सारे क्षेत्र च भरदा ॥ 33 ॥

क्षेत्र क्षेत्रज्ञ च अन्तर ते
मूल प्रकृति शा मोख दा ढंग
ज्ञान नेत्र ने दिखदे जो
होन्दा परम ने उन्दा संग ॥ 34 ॥

श्रीमद्भगवद्गीता उपनिषद्, ब्रह्मविद्या ते योग शास्त्र
सरबन्धी श्री कृष्ण-अर्जुन संवाद च क्षेत्रक्षेत्रज्ञविभागयोग नां दा
तेहरमां ध्याऽ समाप्त होआ।

• • •

चौहदमां ध्याऽ

श्री भगवान उवाच

हून अऊं दस्सना ज्ञानै
च बी जो ऐ उत्तम ज्ञान,
ज्ञानी जो सब मुनियै पाई
परम सिद्धि ने पछान ॥ १ ॥

इस ज्ञान दे स्हारै जो
मेरा रूप न पांदे,
ना सृष्टि बेलै जमदे ओ
ना गै प्रलय काल घबरांदे ॥ २ ॥

महत् ब्रह्म मेरी योनी
उस च फही अऊं राहनां बी,
उस्सै चा फही सिरजन होन्दा
उन्दा जिन्ने बी न जी ॥ ३ ॥

अर्जुन कुल जूने च जेहड़े
बी होन्दे न मूर्तिमान,
उन्दी योनी महत् ब्रह्म,
अऊं पिता जो करदा बीज प्रदान ॥ ४ ॥

सतो, रजो ते तमो गुन ए
 जेहूँडे प्रकृति चा फुटदे,
 देह च अविनाशी आत्मा
 गी ए, अर्जुन, जुटदे ॥ 5 ॥

इन्दे च सतोगुन निर्मलता करी
 तेजवान ते निर्विकार
 सुख ते ज्ञान ने लाग लोआई
 ब'नदा, निष्पाप, ए बन्धनकार ॥ 6 ॥

रजोगुन ममताकारी जान,
 तृष्णा, मोह चा जमदा,
 जीवात्मा गी ए, अर्जुन,
 कर्मासक्ति ने ब'नदा ॥ 7 ॥

अज्ञान शा होआ जान तमोगुन
 सर्व जीव भरमांदा,
 आलस, निद्रा, मत्तूपने दे
 बन्धन च ए पांदा ॥ 8 ॥

सत्त्व सुखै ने लांदा, अर्जुन,
 रज दिन्दा कर्म दा उद्दम,
 ते ज्ञान पर पाइयै परदा
 मत्तूपने च सुटदा तम ॥ 9 ॥

रज ते तम गी दब्बी, अर्जुन,
 सतोगुन करदा अपना कम्म,
 रजोगुन सत्व ते तम गी दब्बी,
 सत्व ते रज गी दब्बी तम ॥ 10 ॥

जेलै इस देह दे द्वारें च
 ज्ञान प्रकाश भरोंदा,
 जानो ए होन्दा की जे
 सतोगुन तां मठोंदा ॥ 11 ॥

लालच, संसार ने लाग,
 कम्मै दी लुमक ते भड़कन,
 रजोगुन दी वृद्धि करी, अर्जुन,
 होन्दा इन्दा सिरजन ॥ 12 ॥

डिरगापन, अज्ञान ते भरम,
 थिड़के दा कर्तब्व शा मन,
 तमो गुन दी वृद्धि होने पर,
 अर्जुन, ए होन्दे उत्पन्न ॥ 13 ॥

सतोगुन दी वृद्धि बेलै
 जद देह धारी मरदा,
 उत्तम कर्मियें दे पवित्तर
 लोकें गी ओ बरदा ॥ 14 ॥

रजो गुन बदने पर गेदा
 कर्म संगिये दे जमदा,
 तमो गुन च मरने आला
 मूढ जूनें च भ्रमदा ॥ 15 ॥

पुन कर्म दा फल निर्मल
 जेहड़ा सतो गुन आला जान,
 राजस कर्म दा फल दुखकारी,
 तामस कर्म दा फल अज्ञान ॥ 16 ॥

सतोगुन कारन होन्दा ज्ञान,
 रजोगुन चाढ़ै लुब्ध दे ढाह,
 तमो गुन कारन भरम, मूढ़ता
 ते अज्ञान दा बनै बनाऽ ॥ 17 ॥

सतो गुनी जन्दे उबड़े,
 रजो गुनी रौहदे बशकार,
 हीनगुनी बृत्ति च पेदे
 तामस पौन्दे झिगड़ै थाहर ॥ 18 ॥

गुनें बिना नेई जेलै होर गी
 दिखदा पन्छानूं कर्तार,
 गुनें शा परे मिगी जानदा,
 ओ आई पुजदा मेरै थाहर ॥ 19 ॥

जीव देह च होए दे
 त्रिगुनें शा लड़ छड़कांदा,
 जन्म, मृत्यु, जरा, दुःख शा
 छुड़कियै अमरता पांदा ॥ 20 ॥

अर्जुन उवाच

त्रिगुनें इनें गी लंघेआ जिन
 के के, प्रभो, ओदे लक्खन,
 के ब्यहार, ते कियां होन्दा
 इनें गुनें शा छुड़कन ॥ 21 ॥

श्री भगवान उवाच

जो नेई होने पर, पाण्डव,
 प्रकाश ते प्रवृत्ति ते मोह
 नेई करदा इन्दी लालसा,
 नां होने पर इन्दे नै द्रोह ॥ 22 ॥

र'वै सब शा न्यारा, जियां आखो,
 गुनें करी नेई होन्दा विचलित,
 गुन गै गुनें च बरतन जानी
 नेई डोलदा जो रौहदा स्थित ॥ 23 ॥

स्वस्थ, धीर लेई इक्कै सुख दुख,
 इक्कै मिट्टी बट्टा कञ्चन,
 चंगा मंदा इक्कै, इक्कै जिस लेई
 अपनी स्तुति ते भंडन ॥ 24 ॥

इक्कै जिस लेई मान अपमान,
 शत्रु मित्र दे पक्ख समान,
 कर्म करै सब होई बेलाग,
 गुनं दा लांघी उस्सी गलान ॥ 25 ॥

जो लग्गियै चंगी चाल्ली
 मेरी भक्ति करदा,
 ए गुन लंघी ओ जोगता
 ब्रह्म होने दी बरदा ॥ 26 ॥

अमृत ते परमानन्द दा,
 ओदा जो अविनाशी ब्रह्म,
 धर्म सनातन दा अऊं गै
 थ'म्मी रखने आला थम्म ॥ 27 ॥

श्रीमद्भगवद्गीता उपनिषद्, ब्रह्म विद्या ते योगशास्त्र
 सम्बन्धी श्री कृष्ण-अर्जुन संवाद च गुणत्रयविभागयोग नां दा
 चौहदमां ध्याऽ समाप्त होआ।

• • •

पंदरमां ध्याऽ

श्री भगवान उवाच

उबड़ियां पौड़ां, झिगड़े टाहले
बड़ै दा रुक्ख जो नित्त गलान,
पत्तर इसदे वेद जो जानै
उस्सै गी ऐ वेद दा ज्ञान ॥ १ ॥

खल्ल उप्पर फैले न्हाड़े टाहले,
विषय दे गुत्थ गुनें करी फुटदे,
कर्म जढ़ें दे जाल बिशे
ख'ल्ल माहनू लोक च जुटदे ॥ २ ॥

न्हाड़ा ए रूप नि इत्थे लभदा,
न आदि अन्त न स्थिरता
बड़ ए डूंगजढ़ी बडिढ्यै
बैराग्य शस्त्र ने करी दृढ़ता ॥ ३ ॥

फही पुज्जै उस पद गी जित
पुज्जी फही नेई होन्दी परताई,
जिस शा पुरातन बड़ विस्तरेआ
उस आदि पुरुष दी शरनी जाई ॥ ४ ॥

न मान मोह, जिती संग दोष,
 नित आत्म ध्यान, न हिरसें रुझदे,
 सुख दुख नां दे द्वन्द्व शा छुड़के
 ज्ञानी उस नित पद गी पुजदे ॥ 5 ॥

न सूरज, न चन्न, न अग्नि
 करदे जिस्सी लोवान,
 न जित पुज्जी माहनू परतोंदा,
 उयै मेरा परम थान ॥ 6 ॥

देह च मेरा अंश
 जीवात्मा सनातन
 खिच्चै प्रकृति च स्थित
 पञ्च इन्द्रियां, छेमा मन ॥ 7 ॥

देह स्वामी जो बी देह त्यागी
 जेहड़ा बी देह पांदा
 ब्हा बास थाहर चा बास जियां
 लेई इने गी उस च समांदा ॥ 8 ॥

जीह, नासिका ते नेतर,
 चमड़ी, कन्न ते मन,
 इन्दे स्हारै गै जीवात्मा
 करै विषयें दा सेवन ॥ 9 ॥

देह तजदे जा इस च रौहदे
 भोग भोगदे गुने जुड़े दे,
 इस्सी मूढ़ निं दिक्खी सकदे,
 दिखदे ज्ञान अक्खिये न गुढ़े दे ॥ 10 ॥

अपनै अन्दर बैठे इस्सी
 दिखदे योगी ज्ञानवान,
 पापात्मा, मूढ़ नेई पांदे
 करियै जतन बी एहदा ज्ञान ॥ 11 ॥

सूरज दे अन्दर जो तेज
 कुल जगत च करदा लो,
 तेज जो चन्न ते अग्नि च
 जान मेरा गै तेज तूं ओ ॥ 12 ॥

रेही भूमि च अपनी शक्ति ने
 सब जीबें गी करना धारन,
 बनी चन्द्रमा रसमय करना
 जड़ी बूटियें दा अऊं पालन ॥ 13 ॥

अऊं सबने जीबें च बैठा
 बनियै प्राणे दी ज्वाला,
 बाहर अन्दर दा श्वास ते
 पञ्च विधि दा अन्न पचाने आला ॥ 14 ॥

सब हृदयें च अऊं, मेरे करी
स्मृति, ज्ञान, भ्रम नवारन;
सब वेदें नै ज्ञान जोग अऊं
वेदज्ञान, बेदान्त दा कारन

॥ 15 ॥

लोक च क्षर ते अक्षर
पुरुष दे ए दो प्रकार,
सब जीबें गी आखदे क्षर,
ते अक्षर दा उच्चा थाहर

॥ 16 ॥

होर गै पुरुष उत्तम जिस्सी
अविनाशी परमात्मा आक्खन
जो ईश्वर त्रलोक च रेहियै
करदा सबनें दा पालन

॥ 17 ॥

की जे क्षर शा आऊं परे
ते उत्तम अक्षर शा बी,
इतै लोक ते वेद च जानन
पुरुषोत्तम करियै मी

॥ 18 ॥

इस चाल्ली जो जानदा,
अर्जुन, मिगी पुरुषोत्तम,
सर्व भाव नै भजदा मी
ओ पूरा ज्ञानी बिन भ्रम

॥ 19 ॥

निष्पाप, गूढ़ शा गूढ़ इयां
 इस शास्त्र दा मैं कीता बिस्तार,
 इस्सी जानी करदा, अर्जुन,
 ज्ञानी करने आली कार ॥ 20 ॥

श्रीमद्भगवद्गीता उपनिषद्, ब्रह्म विद्या ते योग शास्त्र
 सम्बन्धी श्री कृष्ण-अर्जुन संवाद च पुरुषोत्तमयोग नां दा पंदरमां
 ध्याऽ समाप्त होआ।

• • •

सोहलमां ध्याऽ

श्री भगवान उवाच

अन्तः करन दी शुद्धि कनै
ज्ञान योग च दृढ़ता,
संजम, दान, सरलता, तप,
शास्त्र पठन ते निडरता ॥ १ ॥

अहिंसा, सच्च ते कोमलता,
न लालच, न परोख न रोह,
त्याग, शान्ति, दया जीबें पर,
न गै चपलता दी खो ॥ २ ॥

तेज, क्षमा, धीरज, शुद्धता;
न द्रोह, न अपने पर मान,
ए लक्खन, अर्जुन, उन्दे
दैवी संपदा गी जो पांन ॥ ३ ॥

दम्भ, दर्प, अभिमान, क्रोध,
अज्ञान, ते खौरी बानी,
आसुरी संपदा आले, अर्जुन,
माहनू दी नशानी ॥ ४ ॥

दैवी संपदा मोख करांदी,
 मनदे, आसुरी पांदी बन्धन,
 सोच निं कर तूं, हे अर्जुन,
 तूं दैवी संपदा आला जन ॥ 5 ॥

इस लोक च जीव सृष्टि दे
 दैवी, आसुरी, दो लक्खन,
 दैवी भलेआं दस्सेआ, अर्जुन,
 आसुरी जो मेरे शा सुन ॥ 6 ॥

आसुरी जन नेई जानन
 केह करना ते केह नेई करना,
 न जानन शुद्धता सदाचार,
 न औंदा उनें गी सच्च बोलना ॥ 7 ॥

बिन ईश्वर जग ओ दस्सन
 बेस्हारा ते निस्सार
 अपने आप होआ संजोग ने,
 भोग छुट इत्थे होर के कार ॥ 8 ॥

करियै धारना इस चाल्ली
 होआ जिन्दा अपना आप व्यर्थ
 क्रूरकर्मी, थुड़बुद्धि जम्मन,
 पुट्टन जग दा नास ते नर्थ ॥ 9 ॥

दम्भ, गरूर ने होए दे गुट्ट
अतृप्त कामनाएं गी पाली
मूढ़पने ने मिथ्याबाद गी
धारीयै रौहन कुचाली

॥ 10 ॥

बेस्हाबी सोचें दा अन्दर
मरने तक्कर जोड़ी जोड़
विषय भोग च डुब्बे दे
समझन इयै सब दा तोड़

॥ 11 ॥

फसी सैकड़ैं आस फाहियैं च,
काम, क्रोध दे पेड़यै बस,
विषय भोग रूज्जे, बेन्याई ने
धन सञ्चय दा पेदा झस

॥ 12 ॥

अज थ्होआ ए मिक्की ते
कल ए मनोरथ मेरा थ्होग,
मेरै कोल ए धन इन्ना
ते इयै फही परतियै होग

॥ 13 ॥

ए बैरी मैं स'लेआ, अऊं
करां होरने दी बी संभाल,
अऊं खड़पैञ्च, अऊं खंदा पींदा
सफल, जोराबर ते खुश हाल

॥ 14 ॥

धनेआला, मेरा बसदा कुल्ला,
 है कोहदी मेरै नेही हस्ती,
 लैड नन्द, करड जप दान,
 न्हे अज्ञान दी चढ़ी दी मस्ती ॥ 15 ॥

चित्त न डौर भौर केई चाल्ली,
 मोह जाल लपटोए दे,
 विषय भोग च डुब्बने आले
 घोर नरक लेई होए दे ॥ 16 ॥

आपूं गी बड़ेआन घमण्डी,
 दौलत, मान दी पौंदी छंड,
 कुथ'वे नाम मात्र जगैं गी,
 रचने दा ओ करन पखंड ॥ 17 ॥

अहंकार, बल, दर्प, काम
 ते क्रोध गी ब'नदे गंडी,
 अऊं इन्दै ते होरैं च,
 मेरी पांदे भंडी ॥ 18 ॥

इनैं द्वेषियें, क्रूरें ते
 नीचें गी करन जो पापाचार,
 अऊं आसुरी जूनें गै
 संसार च सुट्टना बारंबार ॥ 19 ॥

जन्म जन्म च मूढ, ए अर्जुन,
 आसुरी जूनें च रलदे,
 नेई मी पाई फही इस शा बी
 अधोगति च ढलदे ॥ 20 ॥

आत्मा दे नाशक ए
 नरक द्वार जिन्दे त्रे प्रकार,
 काम, क्रोध ते लोभ, इस करी
 इनें त्रैनें शा पा निस्तार ॥ 21 ॥

इनें त्रेहरें न्हरें द्वारे शा
 छुड़के दा फही माहनू
 चलदा अपना हित दिक्खियै
 परम गति दा . पछानू ॥ 22 ॥

शास्त्र विधि गी छोड़ी छाड़ी
 जो करदा मनमानी
 न सिद्धि पा, न परम गति
 न बनै सुखै दा हानी ॥ 23 ॥

कर्तब्य ते अकर्तब्य दी इस लेई
 जानी बिबस्था शास्त्र प्रमान,
 शास्त्र बिधि अनुसार कर्म
 करने च गै तेरा सनमान ॥ 24 ॥

श्रीमद्भगवद्गीता उपनिषद्, ब्रह्मविद्या ते योग शास्त्र
 सरबन्धी श्री कृष्ण-अर्जुन संवाद च दैवासुरसंपद्विभागयोग नां दा
 सोहलमां ध्याऽ समाप्त होआ।

• • •

सताहरमां ध्याऽ

अर्जुन उवाच

शास्त्र विधि गी त्यागी जो
श्रद्धा ने गांदे प्रभु दा जस,
हे कृष्ण, कनेही उन्दी निष्ठा,
सात्विक, राजस जां तामस ॥ १ ॥

श्री भगवान उवाच

सभाऽ अनुसार माहनुएं दी
इस श्रद्धा दे न त्रै गुन,
सात्विक, राजस ते तामस,
ए हुन तूं मेरे शा सुन ॥ २ ॥

भारत, सब दी श्रद्धा होन्दी
जैसा स्वातम ऐसी,
श्रद्धामय ए पुरुष ओ उयै
जेहदी श्रद्धा जैसी ॥ ३ ॥

देवें गी पूजदे सात्विक,
यक्ष राक्षसें गी राजस,
भूत, प्रेत गनें गी पूजन
होर जने जो तामस ॥ ४ ॥

शास्त्र विधि बिन घोर
तपै गी जेके माहनु तपदे,
काम, राग, बल, अहंकार
दम्भ च जो न फसदे

॥ 5 ॥

देह च बज्जै तत्त समूह गी
ते मी जो शरीर च लीन
मूढ़मति दिन्दे अति डाह
जीन्दे ओ आसुरी जीन

॥ 6 ॥

त्रौं भांति दे भोजन नै
होन्दा इनें सबने दा प्यार,
इयां गै जग्ग, तप, दान नै,
सुन इन्दे तू भेद प्रकार

॥ 7 ॥

आयु, बुद्धि, बल, निरोगता
सुख, प्रीति दा बर्धमान,
रसला, थिन्दा ते दृढ़दार,
सात्विक दा मन भाना खान

॥ 8 ॥

कौड़ा, खट्टा, लूना, तत्ता,
त्रिक्खा, रुक्खा, दाहकारी,
राजस दा भोजन चित्त लगा,
देऐ रोग, शोक, दुःख भारी

॥ 9 ॥

अधपक्का, बे-रसा ते जूठा,
 बुस्से दा, दुर्गन्ध दा मारा,
 बेहा, नेई मुंह पाने जोगा,
 भोजन ए तामस दा प्यारा ॥ 10 ॥

बिन फल इच्छा मन खडेरियै
 समझी करना गै कर्तब्व,
 विधि अनुसार जो कीता जन्दा
 उयै, अर्जुन, सात्विक जग्ग ॥ 11 ॥

धन प्राप्ति दा रक्खियै ध्यान
 जां फही रचने लेई पखंड
 कीता जन्दा जग्ग जो, अर्जुन,
 जान उस जग्ग दा राजस ढंग ॥ 12 ॥

बिन विधि दे, बिन अन्नदान,
 बिन मन्त्रै ते बिन दक्खन,
 बिन श्रद्धा कीता जन्दा जो
 जग्ग उयै तामस दस्सन ॥ 13 ॥

देव, गुरु, ब्राह्मन, पण्डित पूजन,
 अहिंसा पालन, ब्रह्मचर्य ब्रत,
 पवित्रताई ते सरलता,
 आखदे ए शरीर दा तप ॥ 14 ॥

सच्चा, मिट्टा, हितकारी ते
 नेई तमशाने आला बोल,
 शास्त्र पठन दा भ्यास, इयै गै
 बानी दे तप दी परचोल ॥ 15 ॥

मन प्रसन्न, शान्त भाव,
 मौन, अपने पर पूरा बस,
 अन्तः करन शुद्ध भलेआं,
 इस्सी आखदे मन दा तप ॥ 16 ॥

परम श्रद्धा ने तपदे तप
 त्रौं विधियें दा जन जेहड़े
 योगी फलत्यागी, आक्खे जन्दे
 तप सात्त्विक ए केहड़े ॥ 17 ॥

सत्कार, मान, बड़ेआई लेई
 होन्दा जो तप करने दा पखंड,
 फल ओदा नां टिके, नां पक्का
 दसदे ए राजस तप दा ढंग ॥ 18 ॥

मूढ़ताई ते करियै हठ,
 देइयै अपने आप गी ढाह,
 दूए दे अनिष्ट लेई कीते दा
 तप जो ओ तामस खुआ ॥ 19 ॥

देना गै कर्तब्व जिसी,
 जेदा नेई थोना प्रति उपकार,
 देश, काल, पात्र मिलने पर
 दित्ता दान सात्विक बचार ॥ 20 ॥

जो परती किश पानै लेई
 जां पही रक्खियै फलै दा ध्यान,
 दित्ता जा कौड़ा घुट करियै,
 आखदे उस्सी राजस दान ॥ 21 ॥

देश, काल गी बिना बचारे,
 जिस च अवज्ञा, तिरसकार,
 कुपात्र गी दित्ता जन्दा जेहड़ा
 तामस दान दा ओ प्रकार ॥ 22 ॥

ॐ, तत्, सत्, त्रै नां
 इनें ने ब्रह्म दा करदे सिमरन,
 उस्सै ब्राह्मण, वेद, यज्ञ दा
 आदि च कीता सिरजन ॥ 23 ॥

इस लेई ब्रह्मवादियें दे कम्म
 जगग, दान, तप, विधि अनुसार
 आरम्भ होन्दे नित करने पर
 ॐ शब्द दा गै उच्चार ॥ 24 ॥

‘तत्’ जां ईश्वर सब किश जानी
 रखदे फलै ने नेई किश बाह,
 जग्ग, तप, दान कर्म केई करदे
 जिनें गी होन्दी मोक्ष दी चाह ॥ 25 ॥

श्रेष्ठ भाव ते साधु भाव लेई
 ‘सत्’ इयै उच्चरदे,
 श्रेष्ठ कर्म लेई बी सत् शब्द दा,
 पार्थ, प्रयोग न करदे ॥ 26 ॥

जग्ग, तप, दान च दृढ़ता गी
 ‘सत्’ गै’ इयां गलांदे.
 ईश्वर लेई कीते दे कर्म गी
 ‘सत्’ ए’ इयां जतांदे ॥ 27 ॥

बिन श्रद्धा कीते दा, पार्थ,
 जो बी होम, तप तपन ते दान,
 असत् दस्सन, नेई उस करी होन्दा
 इत्थै जां अगै कल्याण ॥ 28 ॥

श्रीमद्भगवद्गीता उपनिषद्, ब्रह्म विद्या ते योग शास्त्र
 सम्बन्धी श्री कृष्ण-अर्जुन संवाद च श्रद्धात्रयविभागयोग नां दा
 सताहरमां ध्याऽ समाप्त होआ।

• • •

ठाहरमां ध्याऽ

अर्जुन उवाच

महाबाहो, संन्यास तत्त दा
पानां चाहन्नां ज्ञान,
कन्ने त्याग दा, प्रभो, ते कृष्ण,
जो भिन्न-भिन्न इन्दी पन्छान ॥ 1 ॥

श्री भगवान उवाच

सन्यास काम्य कर्म दा न्यास,
इयै कविये दा निदान
सर्व कर्म फल त्याग, इस्सै गी
त्याग आखदे न मतिमान ॥ 2 ॥

दोष भरे न कर्म, त्यागने
जोग, मनीषी किश गलान,
आखन किश होर नेई तजने जोग
कर्म न यज्ञ, तप ते दान ॥ 3 ॥

भरत श्रेष्ठ, कर त्याग दे बारै
मेरा निश्चै शरबन,
त्याग जिस्सी, हे पुरुष सिंह,
त्रै प्रकार दा दस्सन ॥ 4 ॥

यज्ञ, दान, तप नेई तजदे,
कर्त्तव्य ऐ इन्द्रा पालन,
यज्ञ, दान, तप करने आले.
ज्ञानी जनें गी पावन ॥ 5 ॥

कर्म एहके करने बेलाग
बिना फलै च होइयै रत,
इयै, पार्थ, मेरे द्वारा
निश्चित कीते दा उत्तम मत ॥ 6 ॥

नियत कर्म दा करना त्याग
नेई इत्त च भल मानस,
कीते दा मोह ने न्हाड़ा त्याग
गै त्याग खुआंदा तामस ॥ 7 ॥

दुखदायी गै कर्म, इयां जो
देहक्लेश भय ने छोड़ै,
राजस त्याग ए करियै बी
नेई त्याग दा फल उस्सी बौढै ॥ 8 ॥

करना गै कर्त्तव्य ऐ जिस्सी
करै जो नियत कर्म बेलाग
तजियै फलै दी हिरस, अर्जुन,
उस्सै गी मनदे सात्त्विक त्याग ॥ 9 ॥

चंगे कर्म ने नेई ममता,
 मंदे कर्म ने नेई द्वेष,
 ओ त्यागी, सतोगुनी ज्ञानी,
 उस दे नेई रेह संशय शेष ॥ 10 ॥

देहधारी शा नेई होन्दा
 कर्म दा भलेआं त्याग,
 आखन त्यागी ओ जेहदी
 मुक्की कर्म फलै ने लाग ॥ 11 ॥

चंगा, मंदा ते मिश्रित,
 कर्म दा त्रै विधियें दा फल
 लगदा सकामियें गी मरियै
 नेई उनेंगी जिनें लाए बलकल ॥ 12 ॥

सब कर्म दी सिद्धि लेई
 दस्से गेदे ए पञ्च बिधान
 सांख्ययोग च, इनें गी,
 अर्जुन, तू मेरे शा जान ॥ 13 ॥

अधिष्ठान, कर्ता ते साधन
 जिन्दे बक्खो बक्ख प्रकार,
 जतन नेक बक्खरे बक्खरे,
 ते दैव दा इस च पंजमां थाहर ॥ 14 ॥

मन, बानी, शरीर ने माहनु
जिस बी कर्म दा पांदा मुंढ,
न्यांऽ आला जां इसदे उल्ट,
इयै पञ्ज न इस दा खुंड

॥ 15 ॥

इयां होने पर बी जेहड़ा
शुद्धात्मा गी कर्ता जानै,
अपनी हीन बुद्धि दे कारन
ओ दुर्मति नेई तत्थ पछानै

॥ 16 ॥

जिस च नेई अऊं कर्ता भाव,
बुद्धि जेदी च निर्मलताई,
न ओ मारदा न गै बझदा
मारियै बी ओ कुल लुकाई

॥ 17 ॥

ज्ञान, ज्ञेय ते परिज्ञाता,
इयै त्रैवै कर्म च लांदे,
कर्ता क्रिया ते कनै कारन,
ए त्रै केहड़े कर्म बनांदे

॥ 18 ॥

ज्ञान, कर्म, कर्ता दे त्रै त्रै
बक्करे बक्खरे गुन
सांख्य शास्त्र च दस्से जियां
ऊआं इनै गी सुन

॥ 19 ॥

सारे बंक्ख बक्ख जीवें च
जो करदा ऐ पन्छान
उस अनबंडे तत्त दी जो नित,
जान उस्सी तूं सात्विक ज्ञान

॥ 20 ॥

सबनै जीबैं च जो दिखदा,
करियै उने गी भिन्न भिन्न,
नेक भाव न्यारे न्यारे
जान उस्सी राजस ज्ञान दा चिह्न

॥ 21 ॥

इक कर्म देह जो मन्नी सरबस
उस्सै च लिप्त अकारन,
बिना अर्थ सार, तुच्छ उस्सी तू
तामस ज्ञान दा जान उदाहरन

॥ 22 ॥

नियत कर्म जो कीता गेदा
रेही अलिप्त राग द्वेष बिन,
उस शा जो नेई फलै दा हिरसी,
सात्विक कर्म तूं उस्सी गिन

॥ 23 ॥

ते कीता जन्दा कर्म जेहड़ा
जेहदै च फलै दी चाहना
अहंकार ने देइयै त्रीड़,
ओ राजस कर्म दा बाना

॥ 24 ॥

मुंड मूढ़ता पांदी जेदा,
 फल, हानी, हिंसा ते समर्थ
 बिना बचारे होन्दा जो,
 इयै तामस कर्म दा अर्थ ॥ 25 ॥

निलेंप, अहं बोल नेई बोलै,
 जेदे च धीरज उत्साह,
 सिद्धि असिद्धि शा इक पासै,
 सात्विक कर्ता ओ खुआ ॥ 26 ॥

लिप्त, कर्मफल कामी, लोभी
 भ्रष्टाचारी, हिंसावान,
 शोक हर्ष च फसे दा, इयै
 राजस कर्ता दी पन्छान ॥ 27 ॥

कूड़, अड़ियल, जीविका नाशक,
 धूर्त, मनं च पेदी भड़कन,
 लिगगड़, झूरे च, कम टालू,
 ए तामस कर्ता दे लक्खन ॥ 28 ॥

त्रे भेद बुद्धि, दृढ़ता दे
 जिन्दा गुनें चा होआ उसार,
 सुन दस्सां ए भिन्न भिन्न
 भलेआं करी इन्दा बिस्तार ॥ 29 ॥

कर्तव्य, अकर्तव्य, प्रवृत्ति ते निवृत्ति,
 भय ते अभय, बन्धन ते मुक्ति,
 बुद्धि इन्दा तत्त जो जानै
 उयै, पार्थ, सात्विकी बुद्धि ॥ 30 ॥

कर्तव्य अकर्तव्य ते धर्म अधर्म दा
 प्राप्त नेई होन्दा उचित ज्ञान
 जिस बुद्धि कनै, पृथुवंशी,
 बुद्धि ओ केहड़ी राजसी जान ॥ 31 ॥

अधर्म गी धर्म जो मिथै, पार्थ,
 पेई अन्धकार दे खूहै
 सब गल्लें च पुट्टी बतैं,
 तामस बुद्धि उयै ॥ 32 ॥

मन, प्रान, इन्द्रियें, दी करनी,
 योग ने होई स्थित थाहर इक,
 जिस दृढ़ता ने होन्दी धारन,
 ओ दृढ़ता, अर्जुन, सात्विक ॥ 33 ॥

फल कामी भलेआं लिप्त होइयै
 धर्म, काम, अर्थ गी ध्याऽ
 जिस दृढ़ता द्वारा, अर्जुन,
 राजसी, पार्थ, उयै दृढ़ता ॥ 34 ॥

निद्रा, भय, शोक, विषाद, मद,
 इन्दे शा खैडा नेई छड़काऽ
 दुबुद्धि जेदे करियै
 तामसी अर्जुन ओ दृढ़ता ॥ 35 ॥

हून तू सुन मेरे कोला
 सुख ओ जिस दे त्रै प्रकार,
 रमी ध्यास नै जिस च,
 अर्जुन, दुखै दा होन्दा निस्तार ॥ 36 ॥

जो आदि च मौहरे साई,
 अन्त च अमृत दे समान,
 उस्सै गी दसदे सात्विक सुख
 जेहदा बी हितकारी आत्म ज्ञान ॥ 37 ॥

विषय इन्द्रियै दे मेल करी
 जो पहलें अमृत समान,
 पर परिनाम च विष सदृश, ओ
 राजस सुख करियै जान ॥ 38 ॥

निद्रा, आलस, मत्तूपन,
 इन्दे शा जेहदा होए उसार,
 भरमाऽ जीव जो आदि अन्त च,
 तामस सुख दी इयै कार ॥ 39 ॥

धरती पर जां देवें च,
 जेहड़े सुगै दे बासी,
 है नेई कोई प्रकृति दे त्रै गुन
 जेदी करन खलासी ॥ 40 ॥

ब्राह्मन, क्षत्री, वैश्य, शूद्र दा
 जो बी ऐ कार ब्यहार,
 कीती दी, अर्जुन, ओदी बंड
 स्वभाविक गुनै अनुसार ॥ 41 ॥

शम, दम, तप, पवित्तरताई,
 क्षमा, सरलता, भाव आस्तिक,
 ज्ञान ते विज्ञान, इयै न
 ब्राह्मन दे कार्य स्वभाविक ॥ 42 ॥

तेज, बीरता, धैर्य, चातुरी,
 रनै चा नस्सना नेई स्वीकार,
 दानी, ईश्वर भाव, इयै ऐ
 क्षत्री दा सहज व्यवहार ॥ 43 ॥

वैश्य कर्म गौ रक्षा खेती,
 बनज बपार स्वभाविक,
 सेवा धर्म शूद्र दा, शूद्र
 सभाऽ शा गै परिचारक ॥ 44 ॥

अपने-अपने कर्म च लगा
माहनू सिद्धि पांदा, हुन
जियां अपने कर्म च लगा
पा सिद्धि मेरे शा सुन

॥ 45 ॥

जिस चा होए सारे प्रानी,
जिस कत्रै कुल सृष्टि व्याप्त,
स्वकर्म ने पूजी उस्सी करदे
माहनू सिद्धि प्राप्त

॥ 46 ॥

स्वधर्म गुनहीन बी चंगा
पर धर्माचरन शा, भावें शैल,
कर्म स्वभाव नियत करने करी
नेई व्यापदी पाप दी मैल

॥ 47 ॥

तज्जना नेई सहज कर्म, अर्जुन,
भाएं दोषा ने भरोए दा,
धूं ने अगग जियां सब कर्म
दोषा ने खटोए दा

॥ 48 ॥

आत्मजयी, बासना मुक्त,
बुद्धि जेहदी लाग शा सुच्ची,
संन्यास योग ने फही ओ पांदा
नैष्कर्म्य सिद्धि परम उच्ची

॥ 49 ॥

सिद्धि आला जियां फही पांदा
 ब्रह्म जो ज्ञान दा परला पार,
 सुन, अर्जुन, मेरे शा हुन तुई
 दस्सां कडियै एहदा सार ॥ 50 ॥

मन, बानी, काया जेहदे बस
 राग द्वेष बसारी,
 शब्दादि विषयें गी तज्जी,
 सदबुद्धि, निश्चे नैं आप सधारी,
 मितहारी, एकान्त निवासी
 ध्यान योग च रौहदा नित्त
 जो बिज्ञान दे आश्रय च ऐ
 चंगी चाल्ली स्थित,
 हंकार, काम, क्रोध, हिंसा दी
 फण्डी जिन छटारी,
 निर्लेप, शान्त करदा फही ओ
 ब्रह्म मिलन दी त्यारी ॥ 51-53 ॥

ब्रह्मवान, प्रसन्न आत्मा,
 ना करदा सोग, न किसै दी चाह,
 सब प्राणी जिस लेई समान,
 मेरी भक्ति दा लैदा लाह ॥ 54 ॥

अऊं आं जो बी, मेरे तत्त दा
 भक्ति ने ओ पांदा भास,
 तत्त मेरा जानियै ओ
 तत्काल मेरे च करदा बास ॥ 55 ॥

मेरे स्हारै रैई सदा
 सब कर्मै गी जो करदा,
 मेरी कृपा ने नित, अविनाशी
 पदवी गी ओ बरदा ॥ 56 ॥

मनै थवां कर मेरे गितै
 सबने कर्मै दा अर्पन,
 बुद्धि योग दे स्हारे धर चित्त
 मेरे च नित, मेरा बन ॥ 57 ॥

ला मेरै मन, मेरी कृपा ने
 लंघी जागा सारे कष्ट,
 अहंकार करी जे नेई सुनगा
 तां होई जागा भूलेआं नष्ट ॥ 58 ॥

जे अहंकार दे बस होई
 'नई लड़ना' ए करै बचार
 मिथ्या तेरा निश्चै त्रीड़ग
 तुगी सभाऽ युद्ध दे थाहर ॥ 59 ॥

कर्म जेहड़ा करने च तेरी
 नेई इच्छा, जो मोह दी कार,
 स्वभाविक कर्म अपने दे बहजा
 करगा उयै होई लचार ॥ 60 ॥

ईश्वर सब जीबें दे हृदय च,
 अर्जुन, ऐ समाए दा,
 यन्त्र चढ़े सब जीबें गी
 उस माया ने भरमाए दा ॥ 61 ॥

उस्सै दी शरनीं जा, भारत,
 जियां बी, जिस बी प्रकार,
 उस दी कृपा ने पाई लैगा
 शान्ति परम, सनातन थाहर ॥ 62 ॥

गूढ़ शा बी अति गूढ़ ज्ञान
 ए तेरे लेई मै दित्ता,
 भलेआं शैल बचारी इस्सी
 कर जो तेरी इच्छा ॥ 63 ॥

कुल रहस्यें चा अति गूढ़
 सुन तूं मेरा परम बचन,
 तूं मेरा अति प्यारा, तेरे
 हितै लेई करना उचरन ॥ 64 ॥

ला मेरै मन, बन मेरा भक्त
मी पूज, कर मिगी नमस्कार,
मी गै पागा, सच्च बचन
तूई आखां, मी तेरै ने प्यार ॥ 65 ॥

सबने धर्मै गी त्यागियै
शरन छड़ी तूं मेरी धार,
नेई कलप, अऊं तेरा सबनें
पापें कोला करां उद्धार ॥ 66 ॥

तूई दस्से दा ए नेई कदाचित
उस लेई दस्सना बनदा
न तप जेदे च, न भक्ति,
जो न सुनदा ते मी भण्डदा ॥ 67 ॥

जो ए परम गूढ़ ज्ञान
मेरै भगतै लेई दस्सै
परम भक्ति ने मेरी, पक्का
आई मेरै च बस्सै ॥ 68 ॥

न उस कशा मनुक्खैं च
मेरा मता प्यारा कर्मकार,
न गै होग कोई धरती पर
जिस्स कनै मेरा इना प्यार ॥ 69 ॥

जो साढ़े दौने दा बाचै
 धर्म संवाद ए लाइयै ध्यान,
 मेरा मत ए, ज्ञान यज्ञ
 ओहदे ने थोग मी पूजा मान ॥ 70 ॥

श्रद्धावान निर्दोष दृष्टि नर
 जो इस पर कन्न धरदा,
 होई मुक्त सत्कर्मियै दे
 शुभ लोकें गी ओ बरदा ॥ 71 ॥

अर्जुन, क्या सुनेआं तूं इस्सी
 मनैं ने लाइयै ध्यान,
 दूर होआ क्या तेरा भरम
 कारन जेहदा अज्ञान ॥ 72 ॥

अर्जुन उवाच

थुआड़ी कृपा ने, अच्युत, मेरा
 मुक्का संशय, स्थिर मेरा मन,
 थोआ ज्ञान, भरम चुक्का,
 थुआड़ा करड बचन पालन ॥ 73 ॥

संजय उवाच

श्री कृष्ण, अर्जुन महात्मा
दा कीता मैं शरबन
इयां संवाद ए अद्भुत, जो
भरदा रोमें च हर्षन ॥ 74 ॥

व्यास कृपा ने मैं सुनेआ
ए परम गूढ़ योग दा ज्ञान
योगेश्वर कृष्ण शा साम धाम
जिनें आपू ए कीता बखान ॥ 75 ॥

करी करियै चेता, राजन,
ए अद्भुत संवाद विचित्र
कृष्ण अर्जुन दा पलें पलें
अऊं पानां आं आनन्द पवित्र ॥ 76 ॥

करी करी सिमरन हरि रूप
है अद्भुताई जेदी अपार
करनां अऊं महाचर्ज, राजन,
हुन्ना अऊं हर्षित बारम्बार ॥ 77 ॥

जित्ये न योगेश्वर कृष्ण,
 जित्ये धनुषधारी अर्जुन,
 उत्थे नीति अचल, लक्ष्मी,
 विजय विभूति, इयै मेरै मन

॥ 78 ॥

श्रीमद्भगवद्गीता उपनिषद्, ब्रह्मविद्या ते योग शास्त्र
 सरबन्धी श्री कृष्ण-अर्जुन संवाद च मोक्षसंन्यासयोग नां दा ठाहरमां
 ध्याऽ समाप्त होआ।

• • •

